

舟山瘖述

劉舟仙瘡述弁言

余素不知醫亦不信醫嘗讀俞曲園太史廢醫論而默焉心許此以知余之於醫實未得其門之故也及門劉君舟仙少長多病乃博覽醫書精究醫理閱數年而宿疾既愈精力益復強健爰推己及人此間戚黨中有患病者偶爲診治立卽奏效於是踵門求醫者日不暇給因鑒夫近年以來天花流行而小兒之厄於痲疹者爲害尤烈乃又考求瘡疹一科適同里鄔君翼孫家藏有其族叔祖雍水先生手抄瘡科一書中多經驗之論惟不著作者姓名嗣又覓得坊刻本鄭氏瘡略與鄭氏保赤金丹兩種參觀合校迺知三書實出一手然其間詳略互異前後錯雜想係輾轉傳鈔所致乃爲之整理其次第考證其得失又益以張氏醫通所得釐訂一書編爲三卷名曰瘡述首述論說次述治例三述方藥書成持以示余余於醫學不能贊一詞惟念吾僑僻在海外既乏良醫又無良藥偶一患病往往束手無策至小兒之症則痛苦既不能言醫藥又無可施一有不幸輒相諉於命數之無可如何而不知其中之誤

於失治與誤於治之不得其當者已不知凡幾矣劉君能見及此其意甚善抑吾聞之鄔氏雍水先生之嗣君友樅先生曾欲將抄本瘡書刻之以廣其傳因力有未逮而止今劉君推鄔氏未竟之志且爲之彙參衆說以臻美備詎不可謂有心人哉余雖不知醫而保赤之心則不能自已因書數語於簡端而歸之并慫慂其亟付諸梓以爲小兒福中元甲子浴佛日遜盒居士湯濬

自序

近世醫書汗牛充棟獨瘡子一症世少專書間有論及非附見於內科諸書之末卽與痘科併爲一談無怪乎瘡症盛行之時病家急欲求醫而一般操醫師之術者諉曰此小兒之恙宜延兒科診治而業兒科者又以見其論症立方多與痘症互見慢不加察每以治痘之方混合施治實則痘發於臟屬陰瘡發於腑屬陽臟腑陰陽懸殊治法判若天淵調治乖方輕者變重重者致死雖天地戾氣之交加造物者默行其殺運未能全恃人力以挽救而療治之法自不可不講求也鄙人幼承家學攻制舉業自科舉廢後迂腐之學知無益於世用乃翻閱醫書以度日間有所得亦爲人治療由近而遠雖不欲以醫名而踵門求治者時有其人歲在辛酉壬戌之際鄉里瘡症大作沿門傳染兒之夭枉於是症者以千百計目擊心傷爰取家藏醫書檢點諸家各有發明惟張石頑醫通辨症用藥最爲詳晰尤合於近時風氣全書卷帙浩繁兒醫度未能家置一篇因擇要抄錄爲是症暗室一燈適有友人鄔翼孫君出其

家藏經驗瘡略一書相質正其書係手抄本前後次序錯雜又不詳作者之姓氏惟篇中有云舍親袁雲山不吝枕秘並授口訣等語至其他各論與坊間所刻鄭氏瘡略及鄭氏瘡科金丹兩書雷同處甚多知三書同出一家鄭氏瘡略刻於清道光間署鄞縣程公璋爲之序全書僅得鄔氏抄本之半而金丹一書刻於清光緒間將原書改頭換尾幾失廬山真面惟卷首序文仍刻程公原序而其孫行彰自序云其祖父卜年公得之於異僧傳授尤所不解統三書而觀之鄔氏所藏實爲真本其書中辨症論治多從黃帝內經立論一切兼症變症亦較張氏醫通爲詳備似鄭氏確爲瘡科專家無疑惟時世變遷方藥異宜古方不能治今病鄭氏原本多用桂枝升麻桔梗麻黃溫燥升提之藥誠如張石頑所云麻爲風熱藥宜涼潤卽鄭氏後人所刻金丹內亦採張氏之論將上藥概從刪去今予所錄分爲上中下三卷上卷採諸家之論爲瘡症之提綱中卷治例一本張氏醫通原書其兼症變症則採鄭氏瘡略以補足之下卷方藥凡見於上中兩卷者錄之以便檢查非敢云瘡症治法盡在是焉

但使世有患是症者倉猝不及延醫將取是書而對症用藥必能多所救全或延醫至未能必其治之恰當與否將取是書而比較用藥庶幾有所折衷焉書既成自愧學識謏陋僅將古人之書抄錄一過未能一言有所發明因定名曰舟仙瘡述亦聊以明述而不作之意云爾

印送舟仙瘡述序

夫痘瘡爲小兒兩重難關。今痘則改種牛痘。已免去一重危險。惟瘡則仍無法避免。是以瘡科之書。大有選擇必要。蓋瘡之將出正出。以至正沒收功。其間過程。變化多端。危險殊不減於從前本痘。倘醫藥調護。稍有失當。難免禍生不測。此不特爲醫者。當深研熟究。卽家庭爲父母。亦宜具相當常識。如何爲天然順瘡。可免除服藥。如何爲太過不及。有醫藥需要。調護如何爲得當。飲食如何爲適宜。均應密切注意者也。舟仙瘡述一書。集各家菁華。至爲豐富。其立論之透徹。分症之詳明。立方之準確。應

有盡有。便於查閱。實超任何瘡書之上。醫士得之。可作治瘡準繩。家庭得之。可作出瘡寶鑑。雖立方必經醫手。而檢閱可察病情。誠爲醫醫必備。家家必備之寶笈也。余得此本。嘆爲瘡書觀止。深惜書中未詳年月。并未詳何家出版。及何地購買。鑒好書之未能普及於世。心殊耿耿。爲特徵求善士。集資印送。聊爲福兒之一助云。

民國二十七年春月

陳春陽序於海上陽春醫廬

承索地址

霞飛路三九八弄五鳳里十號同德昌號
大馬路石路北香粉弄 陳春陽醫寓

舟仙瘡述 卷上

總目

瘡症總論

海藏瘡疹標本論

王肯堂麻疹論

張石頑麻疹總論

葉天士痧疹論

鄭卜年瘡疹骨髓賦

靜遠主人瘡疹西江月

治瘡問答捷要及形色治法大略并輕重順逆不治等症

鄭氏瘡略瘡子泛論

瘡子禁忌

二銘居士瘡略附錄

余師愚疫疹論

舟仙瘡述

卷中

瘡症治例

脈義

發熱

部位

形色

咳嗽

喘

氣促

鼻扇

胸高

觸肺揚涕及痰涎壅盛

噎

汗

嘔吐

乾嘔呃逆吐衄瀉

泄瀉

發不出

透表

不透表

沒早

難沒

渴

搐

瘡後生風

手揉眉目鼻面

筍眼

兩眼看手撕唇口皮撕眼筍毛咬人摳人

掐口摳咬指甲摳鼻

弄舌啞唇

唇口腫硬目睛弔白唇舌破碎扶肚抬胸

咬牙

唇燥

唇舌破裂

譫妄

煩哭

衄血

瘡

音啞

口氣

舌胎

口疳

目病

腹痛

腰脇疼痛

手足痠痛

肢節腫痛

頭目腫

水腫

陰囊腫痛偏墜

腹脹

癰積

便秘

溺瀉

尿如泔濁

痢

睡

不食

身冷

寒戰

寒熱

表裏實熱

潛後瘡疾

痘瘡相連

瘡夾斑丹

斑症

發丹

胃爛發斑

發泡

癰疹

瘡癢

發癢

瘡後遍身糜爛

遍身紫黑紋

瘡後瘡恙

虛羸

妊娠

婦女行經及胎前產後出瘡

瘡後餘毒辨

舟仙瘡述

卷下

瘡症各方

瘡症總論

海藏瘡疹標本論

昔陸親宮十太尉病瘡疹。衆醫治之。王曰。疹未出屬何臟腑。一醫言胃氣熱。一醫言傷寒不退。一醫言在母腹中有毒。錢氏曰。若言胃氣熱。何以乍涼乍熱。若言母腹中有毒。屬何臟也。醫曰。在脾胃。錢氏曰。既在脾胃。何以驚悸。錢曰。夫胎在腹中。至六七月則已成形。食母穢液。入兒五臟。食至十月。滿胃腕中。至生之時。口有不潔。產母以手拭淨。則無疾病。俗以黃連汁壓之。方下臍糞及涎穢也。此亦母之不潔。餘氣入兒臟中。本先因微寒入而成瘡疹。未出五臟。皆兒病證。內一臟受穢多者。乃出疹瘡。初欲病時。先呵欠。煩悶。驚悸。乍涼乍熱。手足冷。面腮赤。欬嗽噴嚏。此五臟證俱見。呵欠煩悶。肝也。時發驚悸。心也。乍涼乍熱。手足冷。脾也。面赤腮頰赤。嚏噴。肺也。惟腎無候。以在腑下。不能食穢故也。凡瘡疹乃五臟毒。若出歸一證。肝水泡。肺膿泡。心癩。脾疹。惟腎不食穢毒。而無諸症。瘡疹黑者屬腎。由不慎風冷而不飽內虛也。海藏云。本

先因微寒入一句。并由不慎風冷而不飽內虛一句。勿認作寒證。大抵瘡疹多熱也。又云。癩之爲病。皆由于子在母腹中時。浸漬食母血穢。蘊而成毒。皆太陰濕土。壅滯君相二火之所作也。因小兒真氣既盛。正氣又旺。邪無所容。或因天冷。或因傷表。或因傷裏。癩由是而生焉。治當何如。外者外治。內者內治。中外皆和。其癩自出。至於惡寒者發之。表大熱者奪之。渴者清之。大便秘結者下之。小便不通者利之。驚者安之。泄者分之。何以執一爲哉。大抵傷寒同治。最爲高論。隨經用藥。不可闕也。假令五日已裏。諸病不能與癩疹辨別者。不可疑作癩疹。必須發之。但各從其所傷。應見治之。皆不妨癩出。若強發之。其變不可勝數矣。前人言首尾俱不可下者。何也。曰。首不可下者。爲癩未顯於表。下則邪氣不得伸越。此脈證有表而無裏。故禁首不可下也。尾不可下者。爲癩毒已顯於外。內無根蒂。大便不實。無一切裏證。下之則癩氣逆陷。故禁尾不可下也。有如所言溫煖蓋覆。不令通風。以其癩未出。或身表冷而惡寒。或天令寒而惡冷。溫煖蓋覆。不令通風。宜也。癩若已出。身熱天暄。何必用蓋覆。而不使之通。

風乎。後人執此二句。首尾俱不敢下。溫煖不令通風。不知天令之所加。人身之所感。致使誤人多矣。大抵前人之言。隨時應變。以其所可者而言之。後人不知其變。故執常而不移也。噫。首尾俱不可下者。以其始終臟腑元無凝滯也。若有一切裏證。及大便祕結者。安得不下。溫煖不使之通風。以其發在冬時。故如此也。若發在夏時。則雖未出亦不用於此也。

王肯堂麻疹論

麻疹浮小而有頭粒。隨出卽收。不積膿泡。北人謂之糠瘡。南人謂之麩瘡。吳人謂之痧。越人謂之瘡。古所謂麻。聞人所謂膚疹是也。與前所謂脾爲疹者不同。小兒有出一二次者。出輕而日數少者。名奶疹子。出稍重而日數稍多者。名正疹子。又出於痘前者。名奶疹子。出於痘後者。名正疹子。初出亦與痘瘡相似。但痘發於臟。疹發於腑。臟屬陰。其病本深。故難出難收。而藥於溫平爲宜。腑屬陽。其病本淺。故易出易收。而藥於清涼爲宜。

萬氏云。痘大而痠腫者。少陽三焦火也。陽道常饒。故大而腫。疹小而碎者。少陰心火也。陰道常乏。故小而密。三焦水穀之道路。脾胃主納水穀。治痘專以脾胃爲主。心肺屬陽。而位乎上。心火旺則肺受之。治疹專以肺爲主。觀其欬嗽者。火炎則肺葉焦舉也。鼻流清涕者。鼻爲肺之竅。以火燦金而液自流也。目中淚出。發熱則移肝。金必尅木。肝之竅在目也。或手搯眉目。唇鼻及面者。肺熱證也。王按。既是心火刑肺金。卽是賊邪。其證當重。何反輕於痘。余每治麻疹。但據見證。以瀉白散加減。大劑投之。卽至危困之證。無不愈者。其他時師。用苦寒降火。辛溫發表。而陷於危亡者。不可勝數。安在其爲心火刑肺也。春溫。夏暑。秋清。冬寒。此四時之正氣也。冬應寒而反溫。陽氣暴泄。火令早行。人感之者。至於來春。必發瘡疥。未出痘疹者。必感而出。雖曰胎毒。未有不_由天行者。故一時傳染。大小相似。但見痘疹之出。卽宜先服三豆湯。代天宣化丸。以預解之。

麻疹初出。全類傷風。發熱。欬嗽。鼻塞。面腫。涕唾稠粘。全是肺經之證。有未傳泄利者。

有一起卽兼泄利者。肺與大腸相表裏。表裏俱病也。惟不可觸冒風寒。及於正蒸熱時。噉食。能變輕爲重。不可不慎。麻疹形證不同。有如發風癩。疙瘡擁起。如雲頭。色赤成癥。隨見隨沒者。有如粟米頭粒。三番俱見而不沒。至三日後方收漸沒者。然皆謂之麻疹。其於欲出未出之際。當合發表之藥發之。則易出易愈也。麻疹有發熱至十餘日始見者。大抵主在發散肺經之熱毒者。始事調理補養病後之元氣者。終事也。其間或兼風。或兼痰。或傷食。並隨宜加對症之藥。其有變症。卽隨病用對症之藥。要不亂投湯劑。則兒無事矣。疹喜清涼。痘喜溫煖。此法人皆知之。然疹初出。亦須和煖則易出。所以發苗之初。只要發出得盡。則便毒解矣。若痘必苗而秀。秀而實。而始毒解也。痘子成實之時。若太溫熱。亦必潰爛。是痘之後。亦喜清涼也。故治痘疹者。無過熱過寒。溫涼適宜。是爲得之。

張石頑癩疹總論

癩疹者。手足太陰陽明二經蘊熱所致。小兒居多。大人亦時有之。是亦時氣傳染之

類。其發熱時。多咳嗽。多噎。多嘔。眼中如淚。面浮腮赤。多瀉。多痰。多熱。多渴。多煩悶。甚則躁亂。咽痛唇焦。神昏。通身紅赤。起而成粒。勻淨而小。斜目視之。隱隱皮膚之下。以手摸之。磊磊肌肉之間。其形若疥。其色若丹。以其陽氣從上。故頭面愈多者爲順。法當清涼發散爲主。藥用辛散以升發之。涼潤以清解之。切忌酸收。凡動氣燥悍。及一切溫補之藥。慎不可犯。誤用禍不旋踵。辛散如荊芥。薄荷。前胡。葛根。麻黃。石膏。大力。涼潤如元參。天花粉。玉竹。麥冬。生甘草。苓連。貝母。連翹。竹葉。皆應用之藥。又當隨所發時月。量兒大小。及見症輕重。而爲制劑。若漸出漸收者。其勢雖輕。而熱尙未平。須防喘急。若連綿三四日者。其勢雖盛。而熱已發泄。必無他變。宜大青湯。或消毒飲。加元參。石膏。麥冬。竹葉。若發熱時。徧身汗出。或衄血者。此毒解也。勿遽止之。若汗出太多。血流不止。當以清肺湯去款冬。杏仁。加麻黃根。以止汗。犀角地黃湯以止血。遲則氣虛神耗。爲難治也。若發熱時。或嘔吐。或自利者。此火邪內逼。毒氣上下行也。俱宜清熱解毒。利小便。切勿止瀉。大凡疹症。發熱時。未有不渴者。但當與棗豆燈心湯。

勿與冷飲。致成水畜。多生變幻也。卽葷腥酒麵。生冷水菓。咸須禁之。癩疹多有熱痰。在肺。初發時必咳嗽。宜清熱透表。不得止嗽。癩後咳嗽。切忌辛溫酸澇。但用清咽滋肺湯。以清餘熱。痰壅自愈。多喘者。熱邪壅肺也。切勿定喘。惟應大劑竹葉石膏湯。去半夏。加貝母。元參。薄荷。如冬天寒甚。癩毒爲寒鬱於內。不得透出而喘。加蜜酒炒麻黃。一劑立止。夏月熱勢盛者。卽用白虎湯加竹葉。忌用升麻。誤服必喘。然喘爲肺氣壅遏。故喘必兼嗽。而張口抬肩者。肺竅不通也。不治。故諺有喘而咳嗽者可療。喘而不嗽者難醫之語。又其症多泄瀉。慎勿止瀉。惟宜芩連葛根。則瀉自止。疹家不忌瀉。瀉則陽明之邪熱得解。是亦表裏分消之義。又有疹收之後。飲食如常。卒然心腹絞痛。徧身冷汗如冰者。此元虛氣弱。兼中惡氣也。朝發夕死。勿妄治之。凡癩疹以鮮明似錦者爲吉。黑晦如煤最凶。頭面不出者重。紅紫黯慘者重。咽喉腫痛不食者重。黑黯乾枯。一出卽沒者。不治。鼻扇張目無神者。不治。鼻青黑糞者。不治。牙疳臭爛者。不治。疹之牙疳。最爲難治。外用無比散吹之。內服加味清胃散。更加荊芥石膏。緩則不

救疹中諸患。不宜依症施治。惟當治本。本者。手太陰足陽明二經之邪熱也。解其邪熱。則諸症自退矣。有夾痘而出者。此毒氣太甚。故一齊湧出。不必治疹。但當托痘爲主。然治痘宜溫。治疹宜涼。此又不可不審。大人男婦出疹。當與外感並治。惟清涼解表。隨天時寒暑施治。凡痲痘並作。臟腑風熱交患也。痲乃風邪外感。痘爲胎毒內發。二者相雜。赤暈發癩。多有誤認痘出太密。而委之不救。殊不知其爲疹夾痘也。當與化斑湯續續頻進。痲毒解而痘自起矣。有種行漿疹子極似痘。最難看。然痘則必有頂盤。疹雖有漿。而痘粒必不堅。根盤必無紅暈也。疹後痘不結痂。乃元氣虧損。當大補脾胃爲主。不可誤認邪熱未盡。復與清熱退火之藥。

葉天士痧疹論

疹屬陽腑經邪。初起必從表症治法。見症頭痛。喘急。咳嗽。氣粗。嘔惡。一二日卽發者。輕。三五日者重。陽病七日外隱伏不透。邪反內攻。喘不止。必腹痛脹悶。危矣。治法宜苦辛清熱。涼膈去硝黃。方書謂足陽明胃疹。如雲密佈。或大顆如痘。但無根盤。手

太陰肺疹。但有點粒。無片片者。用辛散解肌。冬月無汗。壯熱喘急。用麻杏。如華蓋散。三拗湯。夏月無汗。用辛涼解肌。葛根。前胡。薄荷。防風。香薷。牛蒡。枳桔。木通之屬。古人以表邪口渴。卽加葛根。以其升陽明胃津。熱甚煩渴。用石膏。辛寒解肌。無汗忌用。凡瘡疹辛涼爲宜。連翹。辛涼。超出衆草。能升能清。最利幼科。能解小兒六經諸熱。

春令發疹。從風溫濕。夏季從暑風。暑必兼熱。秋令從熱燥燥氣。冬月從風寒。

按徐靈胎批云此是要訣

疹宜通泄。泄瀉爲順。下痢五色者亦無妨。惟二便不利者。最多凶症。治

法大忌止瀉。疹本六氣客邪。風寒暑濕。必從火化。疹既外發。世人皆云邪透。孰謂

出沒之際。升必有降。勝必有復。常有疹外發。身熱不除。致咽啞齩腐。喘急腹脹。下痢

不食。煩躁昏沉。竟以告斃者。皆裏症不清致變。須分三焦受邪孰多。或兼別病累瘁。

須細體認。上焦藥用辛涼。中焦藥用苦辛寒。下焦藥用苦寒。上焦藥氣味

宜輕。以肺主氣。皮毛屬肺之合。外邪宜辛勝。裏甚宜苦勝。若不煩渴。病日多。邪鬱不

清。可淡滲以洩氣分。中焦藥。痧火在中。爲陽明燥化。多氣多血。用藥氣味苦寒爲

宜。若日多。胃津消燦。苦則助燥。劫津甘寒宜用。下焦藥。鹹苦爲主。若熱毒下注成痢。不必鹹以奕堅。但取苦味堅陰燥濕。古人以疹爲經腑之病。忌溫燥濇補。所謂痘喜溫煖。疹喜清涼也。然常有氣弱體虛。表散寒涼非法。淹淹釀成損怯。但陰傷爲多。救陰必扶持胃汁。氣衰者亦有之。急當益氣。穉年陽體純剛之藥忌用。幼科方書歌括曰。赤疹遇清涼而消。白疹得溫煖而解。此溫字。卽後人酒釀。檉木。粗草紙。木綿紗之屬。雖不可不知。然近年用者多無益。疹疔濕。盛熱蒸。口舌咽喉疔。若不速治。有穿腮破頰。咽閉喘促。告斃矣。治之宜早。外治亦另有專方。若湯藥方法。必輕淡能解上病。或清散亦可。疹痢。乃熱毒內陷。與傷寒挾熱痢。邪盡則痢止同法。忌升提。忌補濇。輕則分利宣通。重則苦寒解毒。

按此論字字金玉。學者皆當熟讀。則臨症須有把握矣。

鄭卜年瘡疹骨髓賦

增補

按此賦鄭氏瘡科金丹序云。得之異僧傳授。及借閱鄭氏家藏本云。舍親袁

氏雲山。不吝枕秘。並授口訣。未知孰是。姑誌之以質諸當世博雅。

瘡雖胎毒。多帶時行。氣候寒暄。非令男女傳染而成。其發也。與痘相似。其變也。比痘非輕。愚夫愚婦。每視爲泛常。若死若生。總歸於天命。不知先起於陽。後歸於陰。毒興於脾。熱流於心。臟腑之傷。肺則尤甚。始終之變。腎則無證。若得治法。方稱醫聖。閉門問途。不如途中尋徑。揚湯止沸。莫若釜底抽薪。初發熱時。儼似傷寒。目出淚而不止。鼻流涕而不乾。咳嗽喘急。煩躁難安。以火照之。隱隱皮膚之下。以手摸之。磊磊肌肉之間。其形若疥。其色如丹。出現三日。漸沒爲安。隨出隨沒。喘急須防。根窠若腫兮。疹以夾癰。皮膚如赤兮。疹以夾斑。似錦而明兮。不藥自愈。如煤而黑兮。虛扁難痊。疹症最多。治法不同。微汗常出。熱勢越而不留。清便自調。毒氣行而不壅。腠理拂鬱兮。卽當發散。腸胃秘結兮。急與疏通。苟視大而若細。恐變吉而爲凶。故鼻衄不必治。邪從衄解。便血不必止。毒以利鬆。渴飲不休。法當生津養血。飲食減少。方須清胃和中。他如出之太遲。發表爲貴。出之過甚。解毒最宜。毋伐天和。當視歲氣。寒威凜凜。毒勢鬱

而不行。火熱炎炎。邪氣乖而作癘。或施溫補。恐助其邪。過用寒涼。休犯其胃。制其過。但求其中。誅其暴。必欲其正。遠寒遠熱。陰陽之勝負不齊。責實責虛。人稟之強弱。或異。疹子既出。將息尤難。坐臥欲暖。飲食須淡。風寒若襲兮。爲腫爲熱。鹽酸不禁兮。爲咳爲喘。異氣縱感。變症宜慘。便多膿血兮。倉廩血熱。咳多痰沫兮。華蓋受寒。口爛唇裂。心脾火旺。皮焦髮槁。營衛將枯。特是餘症無常。法在臨病變通。至於藥性。更宜洞悉。防風。荆芥。散腠理之寒邪。紫蘇。葛根。解營衛之蘊熱。蘇子。擅下氣之能。前胡有疏表之力。款冬消痰止嗽。紫苑通肺開結。石斛行血中之滯氣。而用。樗根治瘡後之白痢而設。葱白上升。而發散肺胃。萊菔治氣。可推牆倒壁。竹茹可止嘔吐。柿蒂專療呃逆。芥子降氣。生地涼血。黃連入心而瀉火。黃芩入肺而定喘。元參石膏。治邪火之浮遊。梔子連翹。開惡毒之拂鬱。括蕁潤肺止渴。須合麥冬。知母降火生津。必同黃柏。麻仁性能滋潤。花粉用以解渴。芍藥治腹痛。勿施於未收之前。白朮止脾泄。只用在收盡之日。欲行滯兮。須青皮枳殼而同檳榔。要分利兮。用赤苓車前而共滑石。尿若瀉

兮。利以豬苓木通。咽常痛兮。治以大青惡實。元胡活血止痛。蒲黃逐瘀生血。丹皮破積生新。而引血歸經。紫草利腸涼血。而療疹紫黑。茅根止吐衄。降除伏火。紅花解瘡毒。而散腫赤。咽喉若閉兮。射干助以豆根。牙齒生疳兮。紋蛤配乎溺白。心神驚恐兮。鎮以辰砂。臟腑閉結兮。利以大黃。葶藶杏仁。治喘氣之吟吟。薄荷竹葉。解膚熱之焯焯。火燒人屎。蜜炒麻黃。發癩毒之出現。令邪氣之舒張。枳實山查。助脾胃而化毒。兜鈴骨皮。清肺熱以回瘡。既識藥性。用亦有時。未透表則前葛荆防必用。而已透當除。若已出則芩連梔柏宜使。而初潮勿使。便閉以丑牛易大黃。免寒胃府。喘急用葶藶去升麻。怕增吼嘶。瘡色焦枯。生地歸尾爲要味。疹逢紫黑。紅花紫草正相資。此用藥之元機。則當擴而充之。用藥知時。治有成方。初熱欲出未出際。宜用宣毒發表劑。已出紅腫大甚者。當施化毒清表湯。症輕者用瀉白合乎消毒飲子。毒重者。古方解毒大青與嚼嘗。若有泄瀉。用導赤以分利。如遇嘔吐。命竹茹而相將。若治變症。則有奇方。身熱不除。生地骨皮合四物。口瘡若甚。秘本洗心對三黃。消腫定喘兮。葶藶取效。

化痰行氣兮。二陳爲良。咳嗽氣急。清肺湯解除肺熱而有驗。喉痛唇爛。敗毒散清胃利咽而消殃。氣血已虛。八珍增減而可飲。水穀不納。石斛清胃以堪嘗。利血兮清熱。導滯加桃仁而增紅花。咳血兮。元參解毒加茅根而倍地黃。此治瘡之大略。繼各條而再詳。大抵瘡屬心火。必須解毒清涼。

靜遠主人瘡疹西江月

痧疹俗呼瘡子。蓋因火熱薰蒸。遍身紅點硃砂形。發自心脾二經。最忌黑斑死症。極宜赤似硃紋。大抵治法喜涼清。不可辛甘犯禁。瘡子如何辨認。分明症似傷寒。此多咳嗽有紅斑。噴嚏眼中水現。或見腹中疼痛。或是吐瀉相兼。疹家吐瀉不須驚。正要毒除熱散。瘡與痘瘡異治。二家不可同方。痘宜溫解瘡清涼。又要現形爲上。若受風寒不出。其間凶險難當。急宜發散保平康。切忌神昏腹脹。瘡症因何咳嗽。只因肺與心通。肺金被火苦熬煎。以致咳嗽氣喘。治當清金降火。不

宜誤用辛甘。譬如包子蒸籠然。只要氣鬆火煖。

凡遇瘡子出現。詳看天令如何。假如日煖又風和。荆防敗毒甚可。若是時行疫癘。芥連消毒宜多。用心調理救沉痾。莫學觀天井坐。

且說荆防敗毒。此爲發散仙方。防風荆芥生地黃。酒炒芥連二樣。赤苓乾葛燈草。連翹枳殼牛蒡。元參杏仁實爲良。竹葉水煎停當。

又有芥連消毒。清金散火尤佳。芥連防風及梔柏。枳殼骨皮共把。石膏乾葛知母。連翹牛蒡天花。引用竹葉要多加。此個方兒高價。

若是發散不出。令人真個憂疑。麻黃酒蜜炒如煤。梔柏芥連一例。更加大黃酒炒。連翹牛蒡相隨。石膏蟬蛻紅花子。不効命離塵世。

如見出時紫黑。此般症候多凶。急求人糞路歸東。火煨存性取用。細研酒調吞服。須臾紫黑變紅。若還依舊黑朦朧。管取黃梁一夢。

瘡子現形發熱。尋常只用化斑。石膏梔仁及元參。枳翹牛蒡靈驗。若是毒多熱甚。芥

連消毒爲先。大便秘結。大黃添。務使微溏數遍。
瘡症頻多咽痛。火邪薰灼無他。連翹豆根要多加。射干牛蒡煎罷。外用十宣妙散。吹
喉休要吁嗟。假如見効莫增差。芩連消毒堪誇。
咳嗽聲氣促。只消降火清金。黃芩梔子赤茯苓。葶藶石膏一定。知貝元參地骨。瓜
萸麥冬杏仁。連翹牛蒡妙如神。竹葉將來作引。
瘡症若兼瀉痢。預先用藥調醫。瀉時須用三苓。宜加上車前滑石。如見痢兼赤白。加
減黃芩相隨。大都痢止便爲奇。不効令人疑奇。
瘡後須防四證。不治常致誤人。遍身微熱欠清寧。咳嗽連聲牽引。牙齒疳生走馬。痢
下赤白難禁。各就方法細論評。纔是瘡科醫聖。
問何身中壯熱。只因餘毒留連。金華丸子是靈丹。梔仁芩連龍胆。鬱金雄黃解毒。燈
心地骨湯吞。若還脾約熱綿延。集聖胃苓任選。
集聖當歸川芎。蘆薈靈脂明砂。砂仁青皮莪朮加。黃連酒炙蝦蟆。猪胆粟米糊丸。清

晨米飲吞下。治疳肥兒功最大。此個丸兒堪誇。

平胃五苓合用。方兒名曰胃苓。蒼苓肉桂與豬苓。陳皮朴澤分明。白朮須宜生用。去桂甘草煎成。浮腫泄瀉食積停。入口效應如神。

咳嗽頻頻不止。爲因不禁酸醎。又加火毒肺炎。尤恐胸高氣喘。體實却用葶藶。神虛清肺神丹。如斯調理保平安。莫向風波弄險。

葶藶丸治肺熱。杏仁葶藶防己。牽牛萊菔子相隨。紅棗搗成爲劑。清肺神丹降氣鹽。水煮焙陳皮。苓連梔柏杏仁研。蘇子稀糊丸易。

口齒生瘡臭爛。此名走馬牙疳。金華丸子內求安。外用除疳妙散。先取桶中尿白。火煨白色如鹽。五倍銅綠蠶退紙。再加礬砂冰片。

赤痢下成鮮血。黃連柏葉槐花。枳壳荆芥穗同加。痢止血除纔罷。白痢茱萸滑石。樗根枳壳升麻。烏梅取肉作丸佳。赤白香連可下。

香連又名香橘。五錢木香陳皮。石蓮取肉半數宜。一兩黃連另製。外將茱萸同炒。茱

英只用五錢。炒後去英勿同施。神麴糊丸吞餌。

痘後瘡疹卽現。治法從未講究。專用清肺是妙手。發散與補俱謬。藥用黃芩桑皮。貝母牛蒡同儔。更宜倍入西河柳。特爲後學指授。

瘡後如變癩疾。清涼健脾爲佳。麥冬苡仁粉乾葛。茯苓陳皮鼈甲。柴胡白芍竹葉。知母貝母山茶。渴甚再把石膏加。不渴知母並罷。

更防四種死症。臨時切莫認差。毒多體熱瘦如麻。咳嗽面青聲啞。牙疳肉落唇穿。痢疾禁口吁嗟。此般卽是死冤家。就是神仙亦呀。

婦人出瘡時候。天癸正當臨期。血走氣虛難支持。伏陷恐成在斯。藥忌辛酸升發。養陰加減最宜。用心調理莫待遲。臨危法無可施。

婦人瘡初發熱。經行非期何因。毒火內迫血離經。元參地黃湯進。或將解毒四物。二方合用調停。服後天癸依然行。定變伏陷逆症。

元參地黃神方。丹皮生地元參。炒黑蒲黃梔仁添。水煎入口靈驗。四物除去芍芍。解

毒梔柏苓連。服後經止立便痊。不應中虛症變。

妊娠如逢出疹。熱蒸胎必墮傷。熱甚兒墮母安康。輕或兩全無恙。初潮宜用參蘇減。去半夏木香。或已現瘡須更方。安胎飲用停當。

初潮宜用參蘇。加減全憑神醫。枳壳前胡與蘇葉。除去甘桔陳皮。葛根茯苓同煎。參半木香須忌。加入翹莠川貝宜。勿學庸工執泥。

出現宜用安胎。川芎白芍歸身。蘇葉甘草淡條苓。腹皮烏豆水浸。陳皮湯泡去白。姜炒連壳砂仁。參朮用時須當斟。糯米一撮爲引。

孕婦如逢出瘡。須防熱甚胎傷。芎歸芍地是主方。蘄艾條苓多放。砂仁連壳姜炒。安胎清熱最良。用心調理莫倉皇。務保子母無恙。

產後如遇出瘡。用藥休使寒涼。四君四物十全湯。補養氣血爲上。芪桂因人施用。全在良工審詳。若泥寒涼生氣傷。好是雪上加霜。

且說十全大補。八珍加味成方。川芎歸身生地黃。參苓朮草相將。桂芍俱用酒炒。黃

芪蜜灸爲良。水煎濃汁與之嘗。加減聽憑酌量。

增訂治瘡問答捷要

一問曰。瘡之初出。何以知其發於肺胃二經。答曰。肺主一身之皮毛。胃乃主納五穀。若皮膚堅厚。腠理閉密。而瘡難現。毛孔開豁。毒從裏出。而瘡易透。胃火壅滯。故不能食。火邪清消。而口能食。是以知也。所以治瘡之法。初時專以發散。解表清胃火爲主。宜用加減參蘇飲。去桔梗甘草。加連翹。牛蒡子。荆芥。防風。石膏。治之。又問曰。假如用加減參蘇散發散不出。何以治之。答曰。以麻黃散治之。或以三仙散發之。卽出。

二問曰。瘡症忌用人參半夏升麻。而痘症又用升麻代犀角以補其氣。何以辨之。答曰。瘡乃肺胃熱毒蘊積而發。不宜內實。又不宜溫補。最喜清涼。夫瘡出於六腑。所以先動陽氣。陰血多虧。陽者氣也。故不漿。升麻能升動陽氣上冲。是以瘡症最忌。痘出於五臟。宜內實。最喜溫補而助膿。其以升麻代犀角者。乃生犀地黃湯中用升麻。以引生地而入足陽明胃經耳。

三問曰。瘡疹初出咳嗽。何以治之。答曰。瘡初出咳嗽。宜用加減瀉白散。去人參甘草糯米。合三味消毒散。去甘草。或用白虎湯。除去甘草糯米。合三味消毒散。去甘草。或以三拗湯治之。如或不効。用加味五仙散。去桔梗芽茶。加大力子麥冬主之。

四問曰。瘡症發熱五六日。欲出不出。或作驚候。吐瀉交攻。何以治之。答曰。發熱而瘡欲出不出。乃淫火之毒。內相攻搏。以致胃家受火邪之毒。而作吐瀉。急宜分利。而兼清胃瀉火。以加味導赤散主之。兼驚者。加辰砂滑石末調服。萬無一失。或以麻黃散

去升麻。濟生散等劑治之。

按濟生散不妥
麻黃散爲宜

五問曰。瘡出一日而又收。腹中作脹。喘急者。何也。答曰。出而又收。乃爲風寒所觸。腹中作脹。乃是瘡毒內攻。喘急者。乃是瘡毒攻胃。急宜早治。若遲則傳三經。而難治矣。當以葛根疏邪湯。加瓜蒌仁。石膏。枳實主之。或以回生消毒散治之。使瘡毒內解。則後患可免矣。

六問曰。瘡症服發散解毒之劑。瘡不出而發癩。何以治之。答曰。瘡症服發散解毒藥。

瘡不出而發癥。乃心經君火盛而毒內攻也。當用通利之劑。名爲釜底抽薪。使內熱一解。則瘡易出。縱不出亦不爲害。以化癥解毒湯去升麻主之。或以清寧散加減治之亦可。

七問曰。瘡後作吐瀉不食。發熱。多有難救者。何也。答曰。瘡收後。吐瀉不食。乃脾胃二經之症。脾虛則瀉。胃虛則吐。治法當以理脾安胃爲主。不可遂用人參白朮。只宜用六仙散治之。若熱不退。則以四物湯調六仙散治之。誤用參朮。則助虛氣作喘而死。八問曰。瘡後鼻乾黑燥。昏沈不睡。又有喘急咳嗽。多而用白虎湯而死者。何也。答曰。瘡後鼻乾黑燥。乃火邪刑金。作喘急。乃胃氣虛也。初出而見此候。乃肺胃火邪盛。用白虎湯以清肺金而瀉胃火。實爲得宜。日久胃虛。及收後而見此症。用白虎湯則更有傷胃氣。不死何待。只宜以消毒清肺飲。去桔梗甘草。加瓜蒌仁葶力子主之。可保無虞。倘服消毒清肺飲而不應。可用復元散除罌粟壳桔梗。加瓜蒌仁葶力子。一二服則安。或用補肺阿膠散更妙。

九問曰。瘡後牙疳。多致不治者。何也。答曰。瘡後牙疳。乃失血症。是熱留足陽明胃經。餘毒上攻所致。而有五不治之候。須要看症明白。自外延入內者。不治。無膿血者。不治。通齦白色者。不治。牙齒落者。不治。口臭者。不治。除此症。內服犀角消毒飲。或加味清胃飲。外用藥方搽之。毒消自愈。

十問曰。瘡症又有發斑紅。而瘡反不紅者。何也。答曰。瘡出於胃。斑亦發於胃。斑紅是火太甚。而瘡縱不紅。亦無大害。只宜以清熱消毒治之。用犀角消毒飲可也。或以犀角一味。磨汁與服亦可。若發紫斑。則爲胃爛不治。

十一問曰。瘡初出四肢浮腫。何以治之。答曰。四肢浮腫。乃是濕熱流於四肢也。以五皮飲加葶藶治之。如不應。用木通散與之。一二服即愈。

瘡疹形式要旨症治秘訣

瘡初呵欠噴嚏嗽。密密無縫疔蚤形。下出上收煩燥渴。毒從臟腑發皮生。瘡疹之症。面必紅。咳嗽噴嚏。鼻流膿。兩淚汪汪如哭狀。莫作傷寒一樣攻。

瘡疹症治大略括

瘡疹若不出。宣毒發表先。咳嗽宜清肺。熱多用化斑。

蜜齊治法大略括

瘡疹未出用荆防敗毒散。前胡葛根炒牛蒡。赤苓枳壳同連翹。薄荷石膏多用良。

瘡疹出甚用芩連。知母石膏加元參。麥冬生地牛蒡子。竹葉骨皮名化斑。瘡後咳嗽仍不退。清肺散用芩竹蘼。牛蒡貝母括萸仁。麥防桑皮并地骨。潮熱元參麥門冬。木通知母貝桑皮。生地黃芩與地骨。解熱寧心又清肺。泄瀉三苓或導赤。更將六一散子對。若變痢症香連丸。走馬牙疳清胃散。

驗瘡色吉凶

瘡疹色紅者吉。赤者重。黃者危。黑者死。按黑而光潤為火極似水用藥得當有可生者

瘡疹輕症

或熱或退。五六日而後出者輕。

身有微汗。滋滋潤潤。氣不甚粗。身不焦熱。瘡出必輕。

淡紅滋潤。頭面勻靜而多者輕。

透發三日。而漸收者輕。

瘡已出明白後。而身上皮膚。或青色。或紅紫色者。俱無妨。上身熱。下身涼。此乃隔熱。下涼不妨。

瘡疹重症

鼻出血者毒重。

口出血者毒尤重。

舌出血者重。

二便出血者。重且危。

初起手足心如火熱者重。

初起脚冷如冰者重。

氣喘鼻乾。且又鼻掀。作嘔吐驚搐。狂燥無汗者。最重。

頭面不出者重。

紅紫黯燥者重。

咽喉痛不食者重。

冒風收早者重。

熱移大腸變痢者重。

夾斑夾丹夾癰者重。

瘡疹不治症

黑黯乾枯。一出卽收者。不治。

氣喘心前吸者。不治。

身上一片紅。與肌膚平者。必當發表。如發表後仍復如故。不治。

鼻扇口張。兩目無神者。不治。

鼻青糞黑者不治。

當面牙齒黑者不治。

走馬牙疳者不治。

舌長過寸者不治。

胃爛者不治。瘡色黑者為胃爛

瘡後泄瀉不止者不治。

瘡疹死症括

已收渾身熱不退。昏沉恍惚語無章。飲食不進舌胎白。失智尋衣與摸床。元氣精神混懶散。一魂尙爾未飄揚。逢斯強藥求全毀。任是高明莫主張。

鄭氏瘡略瘡子泛論

痘瘡皆胎毒所為。毒者火也。痘為小陽相火。陽道常饒。故痘大而掀腫。瘡乃少陰君火。陰道常乏。故瘡小而碎密。心火旺則肺受之。故治瘡當以肺為主。凡咳嗽者。火炎

於肺也。鼻流清涕者。以火爍金而液自流也。目中淚出。乃肺移熱於肝也。手揉眉目鼻面者。肺熱症也。春溫夏熱秋燥冬寒之氣。皆四時之正氣也。冬應寒而反溫。陽氣暴泄。火令早行。人感其氣。至於來春。必發瘡子。雖曰胎毒。未有不由於天行癘氣也。瘡子初發熱。與傷寒相似。但瘡子則面頰赤。咳嗽噴嚏。鼻流清涕。目中淚出。呵欠喜睡。或吐瀉。或手揉眉目鼻孔。爲異耳。見此候。便宜用宣毒發表湯。不可作傷寒。妄用汗下也。汗之則增其熱。爲衄血咳血。爲口瘡咽痛。爲目赤腮痛。爲煩躁。爲大小便不通。下之則虛其裏。爲滑泄爲滯下等症。

凡瘡子欲出未出之時。以燈火照之。其皮膚似塗硃之狀。雖一時湧出無妨。卽遍身稠密亦無害。只要色樣鮮紅而不豔。亦不喜赤紫而黯慘。蓋瘡發於心。紅者火之正色也。若瘡色淡白者。心血不足也。養血化斑湯主之。苟其色太紅。燄或微帶紫赤。或出連綿至四五日不沒者。乃陽毒太盛之故。速宜涼解。並宜服大青湯。或用柴胡黃芩。乾葛。紅花。大力子。連翹。涼血滋陰。而血熱自除。所謂養陰退陽之義。亦五死一生。

之症也。若黑色者則其毒尤甚。而十死一生之症也。可不明察而混爲施治乎。

瘡子不論輕重。只要出得盡。則毒邪解。正氣自然和平。如仍然壯熱不退。煩躁悶亂。嘔吐泄瀉等症。此毒邪壅遏於內。手足尖決然未到。急用雙解湯。重用石膏。繼用黃連解毒湯。加大力子。連翹合知母石膏湯降之。庶瘡毒盡解。諸症悉退矣。

瘡子欲出未出之時。當早爲發散。以散其毒。庶無餘災。若不預解。使之盡出。以致毒留於中。回後必爲壯熱。日久枯瘁。或成搐搦。或爲痢疾。或咳嗽吐血。或氣壅痰喘。喉痛身熱。漸致莫救。此雖一時疫癘之染。未有不由人事之未盡也。

凡瘡初出。其色赤紫者。毒勢盛也。但大便調。咳嗽多。右手脈輕重取之皆有力。雖勢重不礙。惟宜隨症調理。若咳嗽少。右手脈無力。雖三日後。其瘡必變紫黑。壅結於皮膚之間。若用解利之藥。其色漸轉紅色。嗽多流涕。頗思飲食者。易治。若二三劑不轉者。難療也。又有瘡色如皮膚一樣。名曰白瘡。看其飲食如常。精神如故。身體安泰。不大熱。無舌胎。大小便如常。此因表虛所致。調理溫煖。勿冒風寒食積。過二三日自變。

紅活而成功矣。如正出之時。被風寒所襲。以致白如肌膚者。其間必見毛竅聳起。當用疏散之劑。解其風寒。方得氣血和平。無有後患。若因病後瘦弱。唇白面白。感時氣而出白瘡者。治宜養血化斑湯。又按血鬱亦致白色。用枸橘切細片。麥麩炒黃爲末。飲畢。以枸橘湯洗極好。此治白瘡遍身搔癢不止症。

按飲畢之上。疑有缺簡。意卽以枸橘末泡湯。或煎湯。又按疏散之劑。鄭氏金丹用葛根疏邪湯。或葛根解肌湯。去赤芍。甘草。加蘇葉。薄荷。枳壳。赤茯苓主之。

瘡子出沒。常以六時爲準。如子出午沒。午出子沒。乃陽成陰生。造化自然之數。凡此旋出旋沒者。輕。若一出連綿三四日不沒者。乃陽毒太盛之故。速以大青湯解之。如逡巡不出。凡風寒外束。皮膚閉密。宜用荆防敗毒散。或加麻黃亦可。

凡小兒初生。未經滿月。發出遍身紅點。俗乎奶瘡子。是也。此因胎中受熱。故生下卽發現於皮膚之間。慎勿作時行瘡症施治。妄投湯丸。宜溯源解毒湯。與母飲之。瘡子只怕不能出盡。若已出盡。則毒邪便解散矣。諸症自愈。經云。瘡無死症。發盡爲

主是也。故凡初熱之時。當先用辛散之藥。以升發之。如發熱不甚。審其唇舌。如果焦刺。狂躁不眠。只宜辛散之中。暫加甘寒之藥一二味。中病即止。還須察其時令寒暄。因病用藥。如時令大寒。表用桂枝葛根湯。加麻黃。大熱。則用瀉白消毒散。不寒不熱。則用荆防敗毒散。或瀉白消毒散之類。至若瘡未出齊。經風罩沒。未得清爽。或誤投寒涼。早沒無汗。反致昏沉者。無論冬夏。皆宜暫用麻黃。張石頑法。葱白紫蘇二味可代。以重開皮腠。若開之而仍然不出。反增腹脹喘急。昏悶不省者。危症也。如審得數日並未更衣。是毒甚於裏。伏而不出。涼膈散加大力子原汁。入前藥。發而解之。再不出危。瘡已回後。餘毒未盡。至三四日外。又復發現。或至五六次不已者。此因發熱之時。不避風寒。致令邪毒鬱於肌肉之間。留而不散。雖前經發散。終屬未暢耳。若因內毒太甚。不能發透。宜重表之。回後用化斑解毒湯。如兼雜症。亦當隨症施治。

瘡回二十日之外。其毒未解。邪火拂鬱。渾身熱甚。晝夜不退。髮枯膚瘁。漸成疔瘰。宜清熱除疔丸主之。若不早治。將來睡則露睛。口鼻清冷。手足厥逆。遂變慢脾。癩癰不

治之症矣。如渾身發熱。未至肉消骨立。但多驚搐。煩躁不寧。此熱在心肝之經。治宜養血湯黃連安神丸兼而服之。

曾見瘡子回後。動止出入飲食如常。猝然心腹絞痛。遍身汗出如油而死者。此因元氣虛弱。失於補養。外雖無恙。內實虛損。倘被疫毒所中。正不能勝。故一中而死。謂之中惡。

又見瘡後恣食葷腥。每致積惡之疾甚多。竟有每年患瘡一次者。或上下身。或全身發則仍然發熱嘔吐煩喘等症。或身如被杖。痛苦不堪。儼然點似紅痧。此皆父母愛惜之過。當重用清解藥療之。則下年再不復發矣。

瘡子禁忌

凡瘡子發表之後。有紅影出於肌膚之間。切忌風寒生冷。如一犯之。則皮竅閉塞。毒氣壅滯。重則遍身膨脹。壯熱無汗。遂變渾身青紫。而毒反內攻。煩燥腹痛。氣喘悶亂。諸症作矣。是欲出不出。危亡立至。不可不慎。

瘡子一症。全在恰守禁忌。調治得宜。如鷄魚炙燂鹽酸五辛之類。宜過七七之後。方可食之。惟宜食淡。不可縱口。致生他症。若誤食鷄魚。則終身皮膚粟起。如鷄皮之狀。或遇天行出瘡之時。又令重出。誤食豬肉。則凡遇出瘡之時。多有下痢。誤食鹽醋。致令咳嗽。則每歲出瘡之月。必多咳嗽。誤食五辛之物。則不時多生驚熱。此出瘡之家所當慎也。

瘡子一症。關係最重。其治之方。切宜斟酌。如生地麥冬。初起忌用。爲其性屬寒涼。致令內伏。補肺斂孔。不能外達故也。至參芪薑附丁桂。與芍藥。燥悍酸濇之品。亦當忌用。爲其能助火傷肺。助氣增喘故也。東垣曰。瘡子宜避一切穢惡氣。及外人入房。遠行勞汗氣。腋下狐臭氣。房中淫穢氣。麝香辛羶氣。誤燒頭髮氣。鷄毛魚骨氣。葱蒜韭薤氣。婦人經候諸血腥臭氣。硫黃蚊煙氣。廁舍穢惡氣。以上諸氣。瘡輕者不必忌。瘡重者不可犯。次要常燒甘香之氣。使腠理疏豁。則內外無犯。而瘡自吉矣。

二銘居士瘡略附錄

二銘居士名未詳

瘡症發熱。其初多半日壯熱。半日或退。或稍輕。面紅頰赤。以後發熱。則日甚一日。不分晝夜。兼之咳嗽涕吐。必是出瘡之兆。至三四日後。兩頰即見細細紅點。從早至午。遍及周身。到手足灣爲初潮。次日熱轉甚。咳嗽亦轉增。出至手足背。爲二潮。再次日至手足尖出齊。爲三潮。三潮將齊。其初潮顏色似覺較淡。再次日周身盡淡。然必身熱減。咳嗽等方肯減。否則還要再隔二三日。纔得回盡。若輕者發熱五六日而出。點亦較稀。色亦較淡。兩日便有三潮。三四日即便回盡。尤輕者發熱二三日即見點。一日間三潮亦齊。點亦稀少。兼症亦甚輕。此其常也。至其變。亦有發熱二三日而出。再一二日而回盡者。亦有發熱六七日而出。必又五六日而回盡者。瘡點凡子刻出者。多午刻收。午刻出者。多子刻收。出瘡雖曰三潮出齊。然亦有一潮上。或二潮上。即一齊湧出。只要部位好。出得透。亦是無害。若三潮既足。點仍不透。卻仍有後患。須要再補透一番。方可安心。

將出瘡子。發熱自陽分時起者。至陰分時熱漸衰。自陰分時起者。至陽分時漸衰。必

如此一二日。或三四日。然後方發常熱。與傷寒及出痘熱象迥然有別。且瘡子熱時。覺坐臥值明暢處。則稍爲鬆快。值黑暗處。則煩悶。瘡點形色細密聳綻。摸去糙手。其出也先膚紅。其回也膚漸淡。

出瘡發熱時。有微汗滋潤。并眼淚鼻涕唾涎。此謂五液俱全。出時色紅而潤。部位齊而透。此順症也。但謹避風寒。調節飲食。可不必服藥。

瘡子第一要避風寒。若發熱至見點時。更不但要避風。抑且要身藏帳中。故使煩蒸。則瘡方能速達。所謂悶瘡是也。然出一潮。亦須稍寬帷幙。出至三潮已足。當使其稍爲涼爽。勿再悶蒸。惟切不可見風受冷。致外感生變。兩顧俗爲瘡門。凡周身俱透。獨此處不起。卽過月外。亦多喘變。若在冬月。或生凍瘡。致血脈凝滯不透。用新棉花蘸芫荽酒溫護。

出瘡發熱。愈壯愈妙。熱壯斯能盡透。但須知此熱乃從胃腑中鬱蒸而出。斷不可誤爲表邪。以大開其毛竅。

出瘡最宜食淡。淡則肺氣淨。且不凝滯血脈。得小便常通。瘡自易出。若酸則斂肺。甜則生熱。辣則助火。鹽則瀉脈。必致變端。以至一切油膩魚腥水菓生冷及芋栗閉氣之物。月內務須禁絕。至鷄肉羊肉河魚河蝦。四十九日內食之。後遇天行時氣。必重出瘡。凡一切禁忌。能守百日更妙。補藥補食。亦須在百日後爲妥。恐肺胃未清。無益有損。

小兒純陽。脈已七至。瘡又陽症。脈自當更爲洪大。必待瘡透。脈方可轉小。若前後倒置。定生變幻。萬氏謂右手脈洪大有力。亦此意也。

出瘡天時。以春夏爲順。秋冬爲逆。以春夏發洩。秋冬閉藏故耳。

瘡後餘邪。致成諸症。卽曠日持久。治法仍從透發。利肺清胃。三者始有效。或有小兒本原自虛。因虛發熱。或因外感發熱。其中瘡根本輕。不過略惹時氣。身發數點。或數十點。數百點。此在似瘡非瘡之間。萬勿作瘡治。致無故受伐爲害非淺。莫若謹避風寒。調養得宜。勿藥爲上。

又有明是出瘡。而身熱悠悠。神情似倦。外形諸症。亦不甚見。瘡點亦不透明。此因瘡勢過甚。胃府填塞。一時不能旋化。而出。所謂重陽必陰也。任兒有虛憊情形。其中必有悶氣不轉光景。試以手按其胸膈。必然眉皺眼楚。當用桔梗山查。閉其肺胃。

瘡子多由天行癘氣傳染之時。沿門闔境。徧地皆然。其症輕重順逆不等。但逢閏年爲多。若此閏年不發。值下次閏年必大發。此係鄭氏世傳瘡科。屢試有驗者。然亦勿膠執成見。遇疑似之症。概作瘡治。

凡遇瘡症盛行之歲。勿輕易種痘。恐致痘瘡並出。穉弱之兒。勢必擔當不起。調治每至棘手。遇若遲緩一年爲妥。

瘡症用桂枝。古方間有。瘡略一書。惟手足尖不起。及治瘡癢。并誤降再表方。加味有之。近見醫家。往往於升發方中。每用此味。一至冬寒出瘡。尤視爲透發必要之品。不知桂枝性烈而橫散。與瘡大不相宜。苟非萬不得已之症。切勿輕用。

出瘡發熱。不食亦無所害。此因胃熱阻隔。瘡透熱清。而胃自開。每見富貴之家。一至

出瘡種痘。必添雇乳媪。不知勉強進乳。多食反致多熱。倘遇生產未及滿月。或因兒殤。及身患瘡瘍等婦。遺害不可勝言。愛之實以害之。發瘡時。熱蒸過甚。致回後皮膚赤爛。松花摻之妙。

瘡既出足。當降之時。有幾味上藥。可當降藥。不論貧富可吃。勿以藥賤而棄之。枇杷葉去毛。竹茹去青取黃。棗荳。芝蔴。炒早米。上五味。煎湯代茶。小兒喜甜。可加白糖少許。有痰加竹油。氣喘炒葎子。胃火盛加水蘆根。溺赤溺血。加白茅根。目赤加生山巵。夏枯草。鼻衄不止。煨髮灰吹鼻即止。遍身風痒。加桑枝。呃逆不止。加刀荳。氣喘加喬麥。骨蒸加青蒿。煩熱加燈芯竹葉。無汗加葱白。利氣消痰。加白芥子。定喘加炒蘇子。

附余師愚疫疹論

論疫與傷寒似同而異。

疫症初起。有似傷寒。太陽陽明症者。然太陽陽明。頭痛不至如破。而疫則頭痛如劈。沉不能舉。傷寒無汗。而疫則下身無汗。上身有汗。惟頭汗更盛。頭爲諸陽之首。

火性炎上。毒火盤踞於內。五液受其煎熬。熱氣上騰。如籠上熏蒸之露。故頭汗獨多。此又痛雖同而汗獨異也。有似少陽而嘔者。有似太陰自利者。少陽之嘔脇必痛。疫症之嘔脇不痛。因內有伏毒。邪火干胃。毒氣上衝。頻頻而作。太陰自利腹必滿。疫症自利腹不滿。大腸爲傳送之官。熱注大腸。有下惡垢者。有旁流清水者。有日數十度者。此又症異而病同也。

論斑疹

余每論熱疫不是傷寒。傷寒不發斑疹。或曰。熱疫不是傷寒固已。至云傷寒不發斑疹。古人何以謂傷寒熱未入胃。下之太早。熱乘虛入胃。故發斑。熱已入胃。不卽下之。熱不得泄。亦發斑。斯何謂歟。曰。古人以溫熱皆統於傷寒。故內經云。熱病者。傷寒之類也。難經分別五種之傷寒。傷寒論辨別五種之治法。既云熱入胃。縱非溫熱。亦是寒邪化熱。故可用白虎化斑三黃解毒等湯。以涼解也。今人不悟此理。而因以自誤誤人。至論大者爲斑。小者爲疹。赤者胃熱極。五死一生。紫黑者胃爛。

九死一生。余斷生死。則又不在斑之大小紫黑。總以其形之鬆浮緊束爲憑耳。如斑一出。鬆活浮於皮面。紅如硃點紙。黑如墨塗膚。此毒之鬆活外見者。雖紫黑成片可生。一出雖小如粟。緊束有根。如履透針。如矢貫的。此毒之有根錮結者。縱不紫黑亦死。苟能細心審量。神明於鬆浮緊束之間。決死生於臨症之頃。始信余言之不謬也。

論治疫

仲景之書原有十六卷。今世只傳十卷。豈痘疹一門。亦在遺亡之數歟。以致後世立說紛紛。至河間清熱解毒之論出。有高人之見。異人之識。其旨既微。其意甚遠。後人未廣其說。而反以爲偏。馮氏錦囊亦云。斑疹不可發表。此所謂大中至正之論。惜未暢明其旨。後人何所適從。又可辨疫甚晰。如頭痛發熱。惡寒。不可認爲傷寒表症。強發其汗。徒傷表氣。熱不退。又不可下。徒傷胃氣。斯語已得其奧旨。奈何以疫氣從口鼻而入。不傳於胃。而傳於膜原。此論似有語病。至用達原飲。三消諸

承氣。猶有附會表裏之意。熱疫志驗。首用敗毒散。去其爪牙。繼用桔梗湯。同爲舟楫之劑。治胸膈手六經邪熱。以手足少陽。俱下膈。絡胸中。三焦之氣爲火。同相火遊行一身之表。膈與六經。乃至高之分。此藥浮載。亦至高之劑。施於無形之中。隨高下而退胸膈之熱。確係妙方。余今採用其法。減去硝黃。以熱疫乃無形之毒。難以當其猛烈。重用石膏。直入肺胃。先擣其窩巢之害。而十二經之患。自易平矣。屢試屢驗。明者察之。

論治疹

疹出於胃。古人言熱未入胃而下之。熱乘虛入胃。故發斑。熱已入胃。不卽下之。熱不得泄。亦發斑。此指寒邪化熱。誤下失下而言。若疫疹未經表下有熱。不一日而卽發者。故余謂熱疫有斑疹。傷寒無斑疹也。熱疫之斑疹。發之愈遲。其毒愈重。一病卽發。以其胃本不虛。偶染疫邪。不能入胃。猶之牆垣高大。門戶緊密。雖有小人無從而入。此又可所謂達於膜原者也。有遲至四五日而仍不透者。非胃虛受毒。

已深。卽發表攻裏過當。胃爲十二經之海。上下十二經。都朝宗於胃。胃能敷布十二經。榮養百骸。毫髮之間。靡所不貫。毒旣入胃。勢必敷布於十二經。戕害百骸。使不有以殺其炎炎之勢。則百骸受其煎熬。不危何待。疫旣曰毒。其爲火也明矣。火之爲病。其害甚大。土遇之而焦。金遇之而鎔。木遇之而焚。水不能勝則涸。故易曰。燥萬物者莫熯乎火。古人所謂元氣之賊也。以是知火者疹之根。疹者火之苗也。如欲其苗之外透。非滋潤其根。何能暢茂。一經表散。燔灼火燄。如火得風。其燄不愈熾乎。欲愈熾苗愈遏矣。疹之因表而死者。比比然也。其有表而不死者。乃麻疹風疹之類。有謂疹可治而斑難治者。殆指疫疹爲斑耳。夫疫疹亦何難治哉。但人不知用此法也。

論疫疹之脈不能表下

疫疹之脈。未有不數者。有浮大而數者。有沉細而數者。有不浮不沉而數者。有按之若隱若見者。此靈樞所謂陽毒伏匿之象也。診其脈卽知其病之吉凶。浮大而

數者。其毒發揚。一經涼散。病自霍然。沉細而數者。其毒已深。大劑清解。猶可撲滅。至於若隱若見。或全伏者。其毒重矣。其症險矣。此脈得於初起者。間有得於七八日者。頗多。何也。醫者初認爲寒。重用發表。先傷其陽。表而不散。繼之以下。又傷其陰。殊不知傷寒五六日不解。法在當下。猶必審其脈之有力者。宜之。疫熱乃無形之毒。病形雖似大熱。而脈象細數無力。所謂壯火食氣也。若以無形之火熱。而當硝黃之猛烈。熱毒焉有不乘虛而深入耶。怯弱之人。不爲陽脫。卽爲陰脫。氣血稍能駕馭者。亦必脈轉沉伏。變症蜂起。或四肢逆冷。或神昏譫語。或鬱冒直視。或遺溺旁流。甚至舌卷卵縮。循衣摸床。種種惡候。頗類傷寒。醫者不悟。引邪入內。陽極似陰。而曰變成陰症。妄投參桂。死如服毒。徧身青紫。口鼻流血。如未服熱藥者。卽用大劑清瘟敗毒飲。重加石膏。或可挽回。余因歷救多人。故表而出之。

論疹形治法

鬆浮灑於皮面。或紅或赤。或紫或黑。此毒之外見者。雖有惡症。不足慮也。若緊束

有根。如從皮裏鑽出。其色青紫。宛如浮萍之背。多見於胸背。此胃熱將爛之候。卽宜大清胃熱。兼涼其血。以清瘟敗毒。飲加紫草。紅花。桃仁。歸尾。務使鬆活。色淡。方可挽回。稍存疑慮。卽不能救。

論疹色治法

血之體本紅。血得其暢。則紅而活。榮而潤。敷布洋溢。是疹之佳境也。淡紅有美有疵。色淡而潤。此色之上者也。若淡而不榮。或嬌而豔。乾而滯。血之最熱者。深紅者。較淡紅爲稍重。亦血熱之象。涼其血。卽轉淡紅色。豔如臙脂。此血熱之極。較深紅爲更惡。必大用涼血。始轉深紅。再涼其血。而淡紅矣。紫赤類鷄冠花而更豔。較豔紅爲火更盛。不急涼之。必至變黑。須服清瘟敗毒。飲加紫草。桃仁。細碎。宛如粟米。紅者謂之紅痧。白者謂之白痧。疹後多有此症。乃餘毒盡透。最美之境。愈後蛻皮。若初病未認是疫。後十日半月而出者。煩躁作渴。大熱不退。毒發於頷者。死不可救。

論悶症

疫疹初起。六脈細數沉伏。面色青慘。昏憤如迷。四肢逆冷。頭汗如雨。其痛如劈。腹內攪腸。欲吐不吐。欲泄不泄。男則仰臥。女則覆臥。搖頭鼓頷。百般不足。此爲悶疫。斃不終朝。按王孟英云。宜刺曲池委中。以泄營分之毒。再灌紫雪丹。以清透伏邪。使其外越。或可挽回於萬一。

瘡症治例

脈義

羅田萬氏云。凡出瘡。但看右手脈洪大有力。雖有他症。亦不爲害。此定存亡之要訣也。愚按。此卽陽症得陽脈之義。若其細軟無力。則陽症得陰脈矣。元氣旣弱。安能勝此邪毒。是卽安危之基也。故凡出瘡月餘。診得陰脈者。卽當識爲陰症。而速宜滋陰救其元神。若執定瘡爲陽毒。而概用寒涼大劑。則未免致悞矣。

發熱

瘡痘之初。必由發熱。但痘熱不過二三日卽出。瘡熱有六七日。或半月乃出。或乍涼乍熱。或壯熱不退。始熱之際。必見面赤眼腫。多涕淚。咳嗽連聲。是其候也。熱甚經日不退。曰壯熱。惟正出時爲正候。若發熱至已出。而熱不少衰者。其症必重。清熱透肌湯。出盡而壯熱不退者。竹葉石膏湯。去半夏。加荆芥。元參。沒後。而壯熱不退者。危。急需涼解爲主。其有熱數日止而復作者。有早熱而暮退者。在初發時爲熱邪未透。葛

根解肌渴。正出之際。而煩熱轉甚。乃邪熱未解。而復內攻也。清熱退肌湯。沒後見爲餘邪未盡。四物湯換生地赤芍。加連翹元參。亦有瘡退身涼。越六七日而復熱者。非餘熱未清。卽復感風邪。當以意消息。或因大病之後。中氣虛而然者。治本爲要。臨病之機。不可不審也。

按鄭卞年云。瘡爲陽毒。非熱不出。亦非熱不散。故瘡症不能無熱。亦不可無熱也。但發熱貴微。而不宜過甚。熱甚者毒必甚。而瘡出必重。熱微者毒亦微。而瘡出必輕。是發熱之微甚。可以驗瘡毒之輕重矣。特是發熱有內外之分。卽蘊熱有表裏之別。未可混爲施治也。其或外雖熱甚。而內則不渴。二便如故。飲食如常。此蒸瘡之熱。熱尙在表。裏實無病。無容妄治。若甚於發表之初。治宜發散。甚於出齊之候。治宜清解。甚於將回既回之時。法宜解利並用。其或表熱甚微。而瘡色赤紫。知其裏熱必甚。宜疏裏熱。而兼解表邪。其或外熱雖甚。而瘡色桃紅。知其裏熱必微。宜祛表邪。而兼解散內毒。如身常有汗。而大熱不退。或兼煩躁熱渴者。此內火薰蒸。

表裏俱熱也。連翹升麻湯宜雙解之。若身熱烙手。口乾目赤。二便熱祕。煩悶不寧者。此表裏實熱也。大連翹飲調益元散。以微利之。若當發熱之初。有腹痛脹滿者。此必外邪與毒氣相併。未得外達之故。蘇解散加焦查青皮之類。有驚搐譫狂者。是爲瘡搐。羌活散鬱湯調辰砂益元散治之。有躁亂狂妄。大渴大煩。如見鬼祟之狀。大便秘結。小便赤澇。是皆毒火內熾之症。大連翹飲合涼膈散。或犀角地黃湯合導赤益元散。至於回後。陰虛血熱。大便不通。而發熱。四順清涼飲去白芍。加丹參。紫草。紅花之類。如回後身但微熱。此虛熱也。不須治之。待血氣和暢。其熱自退。或瘡後壯熱。經日不除。大便堅實。口舌生瘡。咽喉腫痛。或痰涎壅盛。驚搐悶亂者。必瘡毒未盡也。用射干鼠黏子湯。或重降之。或雙解之。或參看各症治之。須當臨症詳察。大抵瘡子欲出。必遍身發熱。或煩躁。或頭眩。或體拘急。及既出。則身熱便退。諸症悉解。此等瘡子。隨出卽收。極輕者也。如瘡子既出。而熱甚不減。此毒盛也。宜大清湯解其毒。便澇者。宜黃連解毒湯合白虎湯。或大連翹飲解其裏。大便不

通者。涼膈散去芒硝。加大力子主之。如熱渴。加麥冬。犀角。花粉。咳嗽。加瓜蒌仁。石膏。有痰。加川貝。桔梗。橘紅。治之。切忌參朮。半夏。南星之屬。倘誤用之。爲害不淺。蓋瘡屬陽。血多虛耗。今但滋陰涼血。其熱自退。此卽養陰退陽之義也。

部位

瘡屬府候。發則先動陽分。而後歸陰經。一身之中。陽部宜多。陰部宜少。陽部宜透。陰部卽不透。亦可無慮。若陰部多而陽部反少不透者。爲險。防有他變。陽部者。頭面背四肢向外者。皆爲陽。陰部者。胸腹腰四肢向內者。皆爲陰也。凡發自頭至足爲齊。頭面多者爲順。先從胸腹煖處起。漸發四肢者順。如從手足起。漸發胸腹背者逆。

形色

色貴紅潤。形貴尖聳。若色雖紅潤而不起。二便艱澇者。清熱透肌湯。如色淡不起。二便如常。此屬本虛。兼當培養氣血。亦有色黯不起。大便秘結。唇舌燥赤者。爲火邪內鬱。白虎湯如元參。荊芥。其有色白不分肉地。惟點粒高聳。晬時卽沒者。邪熱本輕也。

然有表氣本虛。而色白者。調護溫煖。越一二日。自變紅活也。若正出時爲風寒所遏。而色白如膚。必毛竅悚栗。葛根解肌湯。或瘡出成片。一被風寒。便變爲白。身不發熱。而反內攻。煩躁腹痛。痰喘氣急者。危。如毒攻於胃。則嘔吐清水。攻於脾。則腹脹不食。攻於肺。則鼻塞喘促。攻於心包。則唇舌焦燥。不省人事。搖頭掣手。攻於腎肝。則變黑而不救也。若色紫赤而黯。是火毒熾盛。頂粒起者可治。宜涼血飲子。讖語煩躁者。黃連解毒湯。調益元散。枯燥不起者。難治。若頂粒焦者。無論紅淡。皆爲熱劇之候。並宜白虎湯。重用石膏。乾燥無汗。加麻黃以汗之。大便秘者。涼膈散下之。亦有瘡發如雲頭大片。其形有二。一者大片焮赤。一者大片之上。復有小紅點粒。皆火邪熾盛所致。白虎湯加元參竹葉。若瘡出斑爛如錦紋。或出膿血。腥臭不乾。心胸煩悶。嘔吐清水。身溫熱者。白虎湯加黃芩茅朮。若初發時。有但斑屑者。乃風寒在表。而成癩疹。祇宜疏解。俟瘡一透。其疹自退。切勿誤認爲斑。而與苦寒之劑。致瘡內陷而難救也。

按鄭卞年云。若因病後瘦弱。唇白面白。感時氣而出白疹者。治宜養血化斑湯。又

按血鬱亦致白色。用枸橘切細片。麥麩炒黃爲末。飲畢以枸橘湯洗極好。此治白瘡遍身搔癢不止症。

咳嗽

瘡症乾咳。連聲不斷。是火邪凌燠肺金所致。然咳則毛竅開。而瘡易出。故未出之先。最喜咳甚。發透。其咳自己。若出盡及沒後。而咳仍不止者。清咽滋肺湯。咳嗽多痰。去麥冬。加橘皮。茯苓。其有感觸風寒。咳嗽煩悶。嘔吐清水。眼赤咽痛。口舌生瘡者。甘桔湯加芩連。沒後見者。人參白虎湯。去知母。易麥冬。以滋化之。

按鄭卞年云。瘡爲胎毒。毒者火也。火炎於肺。卽作咳嗽。故出瘡宜有咳嗽。但不宜太多。如發熱之初。咳嗽連聲。氣喘目胞。起臥不安。此心火亢極。肺葉焦舉之故。宜瀉白消毒散。或甘桔清金湯。或合知母石膏湯。回後重用石膏。黃芩。山梔之類。至回後而微有咳嗽。此不過肺氣未平。不須調治。卽治宜清肺飲加桔更。甘草。主之。若咳嗽轉甚。上氣喘逆。此肺有伏毒。宜清肺飲合白虎湯主之。若身熱頓嗽。甚至

飲食俱出。此皆熱毒乘肺而然。宜多用清肺飲或清金降火湯主之。若至咳甚。面浮胸高氣喘。口鼻出血。面色或青或白。昏躁抬頭者。此不治之症者。倘心中不動。或用麥冬清肺飲主之。大凡咳嗽多是邪氣上衝。痰滯不行之故。則治嗽當以痰爲先。治痰尤當以順氣爲本。以川貝桔梗開其痰。只壳陳皮理其氣。花粉石膏清其肺。黃芩大力子解其毒。而咳嗽自止。見有肺氣本虛。爲毒所逼。而發喘不已。但無咳血噎食等症。宜用清肺飲加沙參阿膠治之。不可拘於肺熱之說。而純用清肺解毒藥也。

喘

喘者。熱邪壅遏肺竅。氣道阻塞而然。其症有虛實之分。虛者難治。實者易調。虛則小便清利。大便溏泄。身無大熱。雖清痰潤肺。多難護效。實則大便堅燥。小便赤澇。身發壯熱。竹葉石膏湯。去半夏。加萸仁。川貝母。冬月量加蜜炙麻黃。隨手而應。若喘而無涕。兼之鼻扇者。不治。大抵未出而喘者易治。沒後喘者難治。初發時喘者。三拗湯加

石膏芽茶。喘而鼻乾口燥者。白虎湯最捷。若見瘖後。又宜清咽滋肺湯。以滋肺胃。白虎湯又爲切禁。故曰醫不執方。活法在人耳。

氣促

氣促多由肺熱不清所致。初發正出時見之。清熱透肌湯。在正沒沒後。清咽滋肺湯。如喉中有痰。齶齶而鳴者。熱邪阻逆。不得發越也。見於初發正出之間。除熱清肺湯。正沒沒後見者。必邪熱未透。或露風早沒。餘熱內攻。而肺氣受傷也。不治。

按鄭卞年云。喘與促不同。喘者氣粗而壅。壅而急喘。爲肺氣有餘也。促者氣促而短。上下不相接續。爲肺腎不足。二者一實一虛。如或誤治。多致不救。當詳辨之。發喘。此因毒火流入肺金。肺爲氣主。肺火熾盛。則氣隨火上行而發喘。喘者張口抬肩。抬身滾肚。起臥不安是也。治宜清金解毒。順氣消痰。爲主。發熱時。如見有傷食。或便秘而喘者。宜發表中加陳皮。只壳。蘇子。麥芽。神麩。寬腸利氣。消食化痰。見有鼻塞而喘者。此風寒外襲。毛竅不通之故。宜發表中加麻黃。杏仁。葱白。蘇葉。開竅

取汗。汗後而喘仍不減者。此毒火傳裏。速宜麻杏石甘湯。加只壳大黃微利之。回後宜用石膏黃芩知母大力子桔梗地骨皮馬斗令桑葉杏仁川貝母葶藶子等味。大凡瘖後煩熱胸膈不利口乾咳嗽而喘者。用加減瀉白散主之。胸滿者加陳皮只壳柴胡桔梗心下滿者加柴胡只實川連舌燥渴飲加花粉石膏麥冬熱盛痰壅而喘者加蘇子杏仁竹瀝天麻柴胡胆星或專用清氣化痰湯。至喘後脾胃受傷中氣不運不能升降以致毒氣在上而腹脇脹滿者此肝火有餘脾胃不足宜清肺肝二經兼利小便用柴胡黃芩丹參川貝甘草升麻滑石青皮木通生地等味。至瘖後日久或大便泄瀉小便清利唇白身不甚熱此爲虛喘可先用生甘草一錢熟地六錢後用生脈合六味甚效。若氣促不過內熱未清慎勿與喘症同治。又按短氣者火氣赫曦金爲所制而絕寒水生化之源故氣短倦怠汗出此皆肺金本病宜用麥冬清肺飲甘寒生津。又有一種寒涼過度泄瀉骨立氣短似促提不能升咽不能降勢甚危急常人但知短氣喘促病生上焦而不知元海無根。

肝腎已敗。氣脫症也。用貞元飲。希冀萬一。又按麴鹵一症。瘖屬肺胃。喉中麴鹵而鳴者。此痰火內結。不能發越故也。治宜清火降痰爲主。若已沒及沒後。而有此者。是毒氣傳內。速用雙解湯一劑。卽宜重用石膏。知母。黃芩。

鼻扇

鼻扇者。肺將絕也。若兼喘滿痰鳴。此必不治。如咽喉清利。無喘滿。而精神不減者。可治。宜滋培肺氣爲主。沒後見者危。

胸高

瘖症胸高。肺熱熾盛而脹也。多見於正沒沒後。爲肺經壞症。不治。

按鄭卜年云。瘖本肺毒。鼻爲肺竅。心火亢炎。則肺葉焦舉。而肺氣將絕。使喉無痰响。鼻不上煤。而精神尙足。藥以潤肺清痰清熱爲主。論胸高如覆掌。名爲龜胸。此因痰熱壅盛。肺受火尅。則肺熱熾盛。而胸骨脹起也。此時必氣喘鼻掀如煤。肺已絕。脾亦敗。不治之症也。如按其胸中不動。猶可用清肺飲杏仁煎之類。不効。清燥

救肺湯亦可。

附鄭氏瘡症觸肺揚涕及痰涎壅盛。

凡瘡子發熱之初。兩鼻流涕。及瘡出三四日間。兩鼻乾燥。待收回清涕即來。此瘡之最輕而順者也。不藥自愈。若回至二三日。或四五日。清涕不來。須當清肺解毒。如遲久不解。或致喘嗽。或喉中痰响。或壯熱不退。如鼻如烟筒者。有之。至香氣觸鼻。難免頭痛咳嗽。鼻涕常流。名曰觸肺揚涕。宜用黃芩。杏仁。荆芥。薄荷。桔梗。甘草等味。或有霜打茄子更妙。

人身津液。所以資生精血也。被毒火煎熬。則津液隨變爲痰涎也。痰涎壅盛。則肺金填實。而諸病從此起矣。或身熱嘔吐。或肩聳喘嗽。或煩躁驚狂。或昏迷不省。或喉中蛙聲。舌強不能言語。或音啞發噎。乳食不能下咽。皆其候也。凡遇此症。初宜前胡。旋覆花。桔梗。橘紅。大力子。防風。運動其痰。回宜石膏。黃芩。黃連。天麻。鈎藤。川貝。杏仁。廣皮。甘草。清利其痰。再以括蕁仁潤之。只壳寬之。大黃泄之。則肺金清而

諸症退矣。

嚏

瘡症初起而多嚏者。是內火因風邪激搏而然。正出時有嚏者。其症必輕。如沒後尙有嚏者。邪熱盡解。可無餘患矣。如嚏而多涕者。濁壅得泄。肺氣自清。最爲吉兆。若無嚏而鼻塞不通。必有風邪留滯。宜辛涼以透達之。

汗

瘡發之際。常宜微汗。微汗則肌腠疏豁。而邪易透。不可復用升發。升發恐汗大泄。不無亡陽之慮。其有隱陷不透之壞症。用權升發。得大汗而解者。此特語其變也。若壯熱無汗。而皮膚乾燥者。必風寒壅滯難出。多成內攻之候。或腹脹痛。或發喘促。宜與葛根解肌湯。冬月越婢三拗選用。但不可過劑。亦有因瀉極火鬱。皮膚乾燥而難出者。必致唇舌燥裂。二便秘澇。壯熱昏沉。或身體脹痛。喘促痰鳴。無論何時。急宜白虎湯加元參。大力子。山梔。黃芩。竹葉之類。大抵瘡症當以微汗爲順。若始終無汗。雖沒

後不無餘咎。其治總不逾上法也。

按鄭卞年云。有汗出不止。其熱反甚者。其熱在表。陰爲陽擾之故。速宜清火解毒。陽邪解而汗自止也。有睡中汗出不收者。以陽入陰中。而陰不能靜。當歸六黃湯主之。有睡中有汗。覺來久不收者。此食積盜汗。脾冷所致。益黃散主之。有陽明胃經熱甚。火邪燔灼。肌肉。或身熱煩渴。或二便熱濇。而汗出不收者。白虎湯加黃連治之。有頭汗如蒸。而徧身無汗。乃是腎水不足。而火有餘。火性炎上。滲泄無門。不容旁達。燄乃上竄。汗之所以上湧若蒸也。此時若小便不利。渴欲飲水。是爲瘀熱在裏。名爲毒干陽位。治宜滋水生金。方用生地。熟地。天冬。麥冬。元參。知母。桑葉。麻黃根之類。日久徧身發黃。宜大黃湯下之。或茵陳湯。

嘔吐

瘡症初起。吐瀉交作者順。乾霍亂者逆。欲吐不吐者危。嘔吐是胃中熱邪。不得發洩而作。葛根解肌湯。正出及正沒時見者。消毒飲加枳實。川連。多痰者更加貝母。括蕁

根。若沒而嘔者。脾胃虛而熱滯也。石斛清胃散。其有嘔而吐。虵者。胃中痰熱膠固。蟲無所養而上竄也。能食即定。如虵出多而不能食。爲胃敗不治。

按鄭卞年云。有聲有物爲嘔。有物無聲爲吐。嘔吐者。乃陽明胃火上冲。而食難下咽也。治宜順其氣。清其火。而嘔吐自止矣。然或毒氣未透。熱毒積於胸膈。以致喘促氣逆。水乳飲下。爲痰所隔而嘔吐者。尤宜理氣化痰。用只桔二陳湯。以半夏易川貝。加石膏。黃芩。杏仁。天麻。竹瀝等味。或有痰在膈上。在經絡。非吐不可。謂吐中亦有發散之義。經所謂其高者因而越之是也。其或眼胞微腫。面色微黃。或胸膈脹滿。或肚腹作痛。此因傷食所致。治宜兼消食積。其或面赤煩躁。身熱口渴。手足皆熱。此肺與脾胃火毒上冲症也。宜先用川連一錢。石膏一兩。爲末。清湯調服。後用涼膈散治之。或有滴水難入。聞藥氣即吐者。多因胃間熱甚。虵在膈上。聞藥氣即動。動即吐出之故。當用氣味清淡之品。如石膏。西河柳。白茅根。枇杷葉。水蘆根。竹茹。竹瀝等味。或用姜湯作泥丸兩枚。塞其兩鼻。使之不聞藥氣。後乃服藥。一口

卽止。停時再服一口。藥一進步。嘔吐自止。若青筋大露。昏沉不食。喘急大熱。常吐腥臭者。皆不治之症也。

附鄭氏瘡略乾嘔呃逆吐衄瀉衄等症

肺肝有毒。冲入於胃。肺胃受毒。而發乾嘔。在發熱正出之時。乃正氣與毒氣相搏。毒甚則升。而逆上。而發乾嘔。治宜表足。則乾嘔自愈。若瘡回良久。是衝任二經之火。上犯清道。以致乾嘔無物。或時時嘔逆。此臟腑內傷。毒氣內攻之故。最爲惡候。宜用粉乾葛。枇杷葉。煎茶頻服。並取甘蔗自然汁。少佐姜汁。調勻熱服。若得稍平。再用鹽酒炒黃柏。鹽水炒知母。各四兩。炙龜版六兩。酒蒸生地八兩。猪脊髓和蜜丸。鹽湯下。或用化毒湯。

呃者。氣噎也。乃是胃槁而成者。此在上焦毒火鬱肺胃之中。而不得發越故也。治宜石膏。黃芩。麥冬。陳皮。石斛。山梔。丹皮。甘草。桔梗。知母。或加竹茹。省頭草。茉莉花。樹上乾桃。等藥。其或心火亢極。水虧而不能制。水挾火勢。上冲肺胃。而呃逆者。宜

用丹溪大補陰丸。加犀角。黃芩。石膏。治之。若大便秘結。至五六日。大去燥矢而呃逆者。此熱毒伏於腸胃。鬱而不發。下竅通則上竅亦透。沖動肺陰。而發熱呃也。譬如爐底壅塞。火燄不光。迨一透達。而炎炎上行矣。治宜順氣清熱爲主。方用石膏。黃芩。黃連。山梔。丹皮。知母。桔紅。杏仁。葶藶子。甘草。等味。又有心火奔肺。金不能受。宜甘草瀉心湯。若因失下而大便堅實者。小承氣湯下之。

蚘者。蟪食蟲也。將出正出時見之者。此因胃中有熱。膈上有痰。蟲不能容故也。正沒及沒後見之者。此因胃火熱甚而少食。蟲無所養故也。若瀉蚘。多因肺胃火盛。熱移大腸而蒸逼。以致蟲不能容。下從大便而出。大約吐者逆而瀉者順。回宜重用石膏。清胃解熱爲主。真人云。不食而吐出者。胃中實熱也。見食而吐者。胃中虛熱也。氣虛不食。蟲無所養而吐出者。不治。法當清利腸胃。

泄瀉

泄瀉爲瘥之常候。熱邪得以開泄也。發熱時瀉而黃赤稠黏。小水短濇者。屬熱。四苓

散加木通。滑石已出人參白虎湯。去知母。易麥冬。其症多發渴。渴甚不止。熱甚不退。雖數劑無妨。如瀉下清稀白沫。腹疼喜得溫。按者屬寒。胃苓湯去蒼朮。加煨薑。瀉痢窘迫。而腹痛脹滿。或噤氣如敗卵者。爲飲食停滯。枳壳湯加山查黃柏木通。大抵瘡症泄瀉。屬熱者多。屬寒者少。辨治宜早。不可令其瀉久。瀉久則正氣下陷。或成腫滿。或變下痢。並宜枳實理中湯之類。以理脾胃爲主。瘡後瀉利不止。口渴目閉。四肢不溫者。不治。嘔吐不食。洞泄不知者。不治。

按鄭卞年云。太陰主肺。陽明主大腸。肺與大腸相表裏。毒從大腸出。最爲善事。故發熱與見點時。及回後五六日之間。作瀉者。是瀉火也。瀉毒不瀉元。切勿止之。若回後至七八日而仍瀉者。此因肺移熱於大腸。治宜加減四苓散。如瀉出似抱退鷄卵臭者。傷食也。宜加焦山查炒麥芽檳榔青皮等味。以消積解熱。瀉出純是清水。或便色雜出。穢氣不堪。腹內疼痛。或煩躁不寧。治宜重用黃芩黃連清金降火。佐以枳壳大黃。拔毒止痛。而泄瀉自止矣。或云治瀉大法。忌寒涼解毒之藥。不知

此非所論於熱毒瀉利之瘡症也。蓋瘡症熱毒太甚。不能盡行肌表。勢必至留滯而內擾。幸內實不受邪侵。注於大腸。大腸爲傳送之官。不受毒害。迫於其中。頻頻瀉出。雖與泄瀉相似。而其實不同。蓋他症之瀉。滑而不禁。瘡瀉則堅而閉塞。他症之瀉。溏而不實。瘡瀉則凝結如膠。切勿一例用參朮桂附芪訶木香豆蔻等補瀉之劑。以致腹脹喘促。重滯不救也。又有原進原出者。此係火性奔迫。不及分消之故。經所云不殺穀者是也。若久瀉元氣下陷。肛門疼痛。火實堅塞。須加升麻五六分提之。而便自順矣。凡有內熱火結。注瀉不止者。須當以寒藥下之。或黃芩湯。白頭翁湯。結而利自止矣。所謂通因通用也。

發不出

初起發熱咳嗽。渾身脹痛。有似傷寒之候。惟乾咳連聲。目赤多淚。嘔惡便溏。確爲出瘡之驗。若將發之際。或爲風寒暴襲。或因肢體坦露。寒鬱熱邪。不能外出。此全盛之勢未萌。與出後沒早不同。如氣粗喘促。腹中脹痛。煩擾不寧。而不得出。急與麻杏石

甘湯。或越婢湯去棗。重加石膏。輕則升麻湯以升發之。若因觸犯霧露風寒。隱現不能發出。以新猪矢冲湯。隔簾蒸之。冷則更添滾者。并取猪矢燒灰。葱白湯下二三錢。乃痘瘡黑陷用燒人矢之變法。卽燒人矢亦能發之。發之仍不出者。神丹不能復圖矣。按張石頑云。古方瘡症升發劑中。多用升麻。曷知升麻性升。能升動陽氣。每致邪熱上浮。而作喘逆。當以紫蘇葱白代用。非特升麻當慎。卽桔梗初起亦須酌用。恐其載引濁氣於上也。蓋瘡症宜涼宜潤。一切辛燥之味。當爲禁劑。用藥之機。可不爲之慎重乎。

透表

瘡子無問尖大細小。必得透表。可後無患。其有一種匾闊。赤成塊。塊上復有小粒。平塌不起者。亦有一片如風毒。偏高紅腫。但頭粒不尖。二者雖透。其中必有熱邪留伏。防有他變。並宜竹葉石膏湯去半夏。以滋化之。縱有餘熱。從此渙散矣。

不透表

瘡出而皮膚乾燥。毛竅悚慄。不能透表者。風寒鬱遏也。越脾湯葛根解肌湯。隨輕重取用。其有表虛不勝疏透者。一味葱白濃煎。時時與之。但得微汗卽解。若頭粒隱隱紅紫一片。而不透表者。火毒熾盛也。白虎湯加荊芥元參。如肌膚不燥。唇色淡白。二便如常。而不透者。中氣本虛也。消毒飲加連翹木通車前子白茯苓。雖有蘊熱。不可輕用寒涼。卽用峻劑升發。亦必不能復透。但當解利。使之內托爲主。亦有胸背腰腹煖處起發而紅。頭面手足。乍有乍無。此症必纏綿難已。且有沒後五七日復發如前。兩三次而愈者。此氣候之異。當非不透之比。祇宜辛涼透表。漸次向安。欲求速效。轉增危殆。

按鄭卞年云。瘡子一症。雖原於有生之初。然必因時氣相觸。內外挾邪而後作。故凡治瘡者。於初熱之時。卽用輕揚之劑。微汗以散之。但使外感之邪。臟腑之毒。皆從穢汗。盡從毛竅中滲出。則毒氣已減其半。而重者可輕。危者可安矣。夫瘡之變症。無非毒氣欲出不能出之所爲。一經表散。則毒從汗解。而諸症悉退。然發表之

法當識毒邪之微甚。若表邪甚者。微散之。則表不能解。無益於事。表邪微者。妄汗之。則標氣必虛。瘡難出足。而反爲大害。故發表當以得中爲宜。亦以微汗爲貴。不可過傷標氣也。其有大熱不退。肌膚秘密。或氣候寒凝之時。則不得不大爲發表。一發未應。或至於再。必令身熱由汗而退。則毒氣解散。而瘡可無後患矣。此發表之微甚。卽治瘡之權衡也。故凡出瘡。但得毛竅中常見津津潤澤。則皮膚通暢。毒邪無不透達。瘡必易出易收。無不善矣。胡氏曰。表熱壅盛。非微汗則熱不解。裏熱蘊結。非微利則熱不除。信哉。

沒早

瘡出未經三日。或爲風寒外鬱。或熱邪內陷。或誤食酸收之物。一日半日卽沒。周身煖處。絕無紅影。終變危候。若雖早沒。肌膚煖處。尙未全沒。急須透表。發之不起。卽當審其所觸。而與內解。如外爲風寒所遏。邪反內攻。而早沒者。消毒飲加葱頭熱服。復透者吉。甚則麻黃。川山中。或越脾三拗選用。若不急治。必喘脹而死。亦有遍身青紫。

熱腫喘脹氣急。此毒滯血凝。半匿肌表。急投涼膈散去芒硝。加麻黃石膏。以發越之。若腹脹喘促。溺瀦臍突者。涼膈散加葶藶子。庶或可救一二。若內挾痰熱。火毒亢劇。而伏匿。煩躁。或腹脹喘急。不省人事者。白虎湯加元參竹葉。若誤食酸收之物。伏匿壯熱。喘咳煩悶。以豬胆汁製甘草煎成。續續與之。得吐微汗爲效。或苦瓠生甘草煎湯灌之。亦能取吐。吐中便有發越之義。誤食豕肉。喘脹氣急。枳壳湯加山查芒硝。以下奪之。誤食核桃。喘咳聲痞。消毒飲加石膏馬斗令。若得熱退身安。氣息漸調者。方可無慮。或大病之後。或洞泄不止。中氣本虛。不能發越而早沒。惟當健運中氣。略兼解表清熱。若沒後。遍身搔痒者。露風早也。消風散以疏解之。

難沒

西北水土剛勁。稟質亦厚。瘡必五七日乃沒。東南風氣柔弱。瘡出不過二三日即化。邇來地運變遷。未有不綿延數日者。當非難沒之比。若三四日後。點燥色白。隱隱於肌腠而難沒者。此必衛氣素微。不能煥發。或衣被單薄。阻其發越之機。以致綿延多

日。法當辛散透達。不可遽用寒涼。蔽其開泄之路也。

渴

渴乃肺胃熱盛之候。唇口必紅。二便祕澇者。門冬甘露飲。若二便清利。唇色不紅。而但渴者。此必寒涼太過。脾虛不生津液而作渴也。七味白朮散去木香。加糯米。渴而煩躁者。是熱邪凌燦心包。白虎湯加麥冬竹葉。正沒時。竹葉石膏湯。去半夏。渴而腹脹者。本虛實滯。爲難治也。

按鄭卞年云。瘡症發渴。多因胃火上炎。薰灼心脾。心脾熱熾。肺焦胃乾。以致津液枯耗。華池乾涸之故。蓋金能生水。而畏烈火。肺既受傷。是失生生之源也。故腎水竭而發渴隨之。然初熱時。便見唇焦舌燥。大渴引飲。此心火大炎。腎水不升。血液枯稿。治宜升麻葛根湯。重用乾葛。甚者加麥冬。再以菴荳。芝麻。炒米。和煎代茶。切不可用白虎黃連解毒等湯。至回後餘熱未清。或大便燥結。而熱渴者。清肺飲加只壳。大黃主之。若多熱多躁。咽乾口燥。渴欲飲水。能食便秘者。此熱在肺胃二經。

宜白虎湯加芩連麥冬花粉。只壳大黃。生其津液。制其烈火。而渴自止矣。如回後自利不止。而發渴者。此腎陰虧損。速救脾腎。異功散合大補陰丸主之。大凡發渴。宜辨虛實。果其喜冷惡熱。百杯未足。是熱炎如爐。五內已竭。宜制火生金。倘喜熱惡冷。稍飲卽止。不過津乾口燥。非發渴飲水者比。治宜生津。禁投寒涼。

搐

搐爲痰熱聚於心包。見於初發未透之時。清熱透肌湯。加萸仁竹葉。沒後見者難治。祇宜清輕之劑調之。不可誤用金石。痰涎壅盛者。一味括蕁湧吐之。若搐無痰鳴。或自嚙指者。非眞搐也。此爲正虛不能主持。必死不治。

按鄭卞年云。熱毒犯心。心爲瘡主。忽被風邪束縛。不得汗洩。大小腸鬱結。不得內行。是以心火亢極。肺金受尅。不能制服肝木。神氣不安耳。故吐食而更兼筍眼。症屬肝風鼓動。瀉肝湯主之。或面青而又見抬頭。症屬肝風煽火。宜消毒化斑湯。氣亂神昏。遂生驚搐之症。初起時。宜先行發散。兼利小便。使內外分消其毒。而驚搐

自定。發散宜用消毒飲加味。至回後當平肝木。利小便爲要。瀉肝則風去。利小便則心熱清。而驚搐定矣。宜龍胆瀉肝湯。或清解散主之。又有痰嗽喘滿。肺金受病。肺主氣。肝主血。是爲金木相併。氣血兩搏。亦主驚搐。治宜清肺飲。若筋抽脈惕者。是火伏而驚也。肝主筋。毒在於肝。不得尋竅而出。筋脈受其衝激。以致抽惕如驚。而實非驚也。用蘇解散。或清解散主之。大凡瘡後熱久不退。忽作驚搐者。不可作驚搐治。倘面赤唇紫。聲音响嘔。口氣粗急。手足熱盛。而驚搐者。此毒火壅遏於內。不能驟發於外故也。宜用清解散以宣之。如聲重鼻塞。清涕而驚搐者。此內毒本盛。外爲風寒所束。鬱滯不得外出。宜用蘇解散以發之。又有痰涎壅盛。氣急胸滿。而驚搐者。治宜清氣化痰湯。若肝胆實熱。大便秘結。而煩躁驚搐者。宜用龍胆瀉肝湯。

附瘡後生風

回後營衛俱虛。虛極則生熱。熱極則生風。其症手足瘦癢。目直項急。角弓反張。口

吐白沫。是脾爲肝木所尅。治宜疏肝祛風爲急。

手揉眉目鼻面

瘡出於脾。脾傳於肺。肺中火邪熾盛。以致眉目鼻面。狀如蟲行。兒不能禁。故手揉之。宜清肺飲合甘桔湯。重用石膏黃芩兼柴胡治之。蓋眉目鼻面。陽明胃大腸之脈。聚會之處。故重用石膏黃芩。若治之未得。將來咳逆喘促。與夫咽乾舌刺。瀉利膿血。或大便秘結等症至矣。故王損庵一見此等症。用瀉白消毒散。

筍眼

眼屬肝。肝主風。目連筍者。肝有風也。肝風入目。上下左右如風吹。兒不能任。故連筍也。治宜瀉青丸主之。

兩眼看手。撕唇口皮。撕眼筍毛。咬人摳人。

此因出瘡之先。過用麵食。或正出之時。用麵食者。或回後胃氣漸開。卽思麵食。而用之太早者。由是引動胃火。以致清涕不來。身體作熱。兩眼看手者。有之。唇口撕

皮者有之。眼筋嘶毛者有之。咬人摳人者有之。此皆瘡後麩食之病也。宜清肺解毒中。加以消導之品。若因瘡後作痢。而見此等形症者。又當以解毒分利治之。

搯口摳咬指甲摳鼻

口爲脾之竅。脾經熱盛。故搯之。又有風邪客於心肺。心火熾盛。肺金受尅。亦能搯口。初起宜用升解散。回後只宜重用生石膏。或加川連。山梔等味。瘡毒之邪。干於肝經。指甲乃肝之外竅。肝經有毒。外竅形焉。木來侮土。是爲鬼邪。故小兒摳咬指甲。治宜伐肝。龍胆瀉肝湯。或小柴胡湯。至鼻爲肺竅。肺熱未清。故摳之。清肺飲主之。

弄舌啞唇

舌爲心苗。心寧則舌寧。心擾則舌亂。又爲脾絡。心脾有熱。其苗自不能寧。故弄搯不息。或長出不收。唇乃倉廩之官。其華在唇。且胃脈環於唇口。啞唇者。或唇硬者。乃是脾火獨熾也。若唇口已啞破。用荷葉浸軟貼之。辰砂和蜜敷之。若唇肉已傷。

者不治。凡此二症。如回後見之。重用川連。石膏。蓮心。梔子。黃柏。生地。甘草。銀花。防風。知母。等瀉心脾之熱。或犀角消毒飲。合導赤散治之。蓋心火熾盛。則脾土燥裂。故也。若泄瀉後。面白神恍。舌上白苔而弄舌者。此係津液不榮。不能上潮於口。是爲內虛生熱也。用藥大宜斟酌。切勿妄投寒涼。致令不救。

唇口腫硬目睛弔白唇舌破碎扶肚抬胸

唇口爲脾之外竅。腫硬則精血已亡。而脾胃已絕。速用人參白虎加川連治之。或有得生者。目爲肝竅。目睛屬腎。眼白屬肺。目睛弔白。是肺金火盛。不能生水。以致肝水熱甚。而將侮土。宜龍胆瀉肝湯治之。不效。速用滋腎丸救之。肚乃胃部。胸乃肺部。扶肚抬胸。是毒邪上冲肺胃。宜用涼膈散主之。唇爲脾竅。舌爲心苗。唇舌破碎。此心脾火盛。上薰所致。若在初起見形。或宜清涼疏托。若在回後。爲心脾俱壞。白虎湯加川連救之。

咬牙

痘症咬牙。有寒熱之分。瘡症咬牙。皆爲熱例。乃陽陷於陰。故多發渴而手足熱。喜冷飲者。麥門冬湯加丹皮。若手足不熱。而反厥冷。喜飲熱湯。此爲熱邪內亢。後必下血。咽喉作痛。痰鳴而死。卽與白虎湯。多不可救。

按鄭卞年云。瘡屬陽明胃經。及移於五臟。移於肝則咬牙發搐。治宜小柴胡湯合導赤散。張真人云。咬牙乃陽明胃經主之。陽明主肌肉。其經走上下齒齦。邪并陽明。故咬牙耳。治宜重用石膏。以清胃熱。黃芩次之。若在初熱。則宜升解散。以提表之。又云。肝腎火旺。亦相戛而鳴。蓋肝藏血而養筋骨。腎主骨而生肝。還以養血。猶唇齒之邦。兩受其虐。而失和。齒乃妄劇而自鬪矣。但虐者聲鬆。彼則聲緊。經云。毒火深藏。腎與肝升沉二臟。擾何安。齒牙相戛。聲何慘。透解漸藏。自貼然。是也。有夢中咬牙者。風熱也。由手足陽明二經積熱生風。故令相戛而有聲也。風屬陽。動則風行於陽。靜則風歸於裏也。治宜消風散。治肝火盛而咬牙者。清神化毒湯。加柴胡。胆草。木通。甘草。生地。麥冬。等。

唇燥

唇燥多屬脾胃之熱。淡而燥者其熱輕。赤而燥者其熱深。紫黑而燥者熱劇而重也。隨輕重以清潤之。

唇舌破裂

唇舌破裂。心脾之火上衝也。其色必多深赤。初發正出時見之。白虎湯加芩。連。荆芥。元參。薄荷。若正沒沒後見者。心脾俱絕。及紫黑枯燥。而血不活者。皆難治也。

譫妄

譫妄是熱邪熾盛於心包。若發熱正出時見者。爲火邪內伏。不得透表而致。白虎湯加荆芥。大力子。甚則加麻黃以發越之。在正沒沒後。並宜竹葉石膏湯去半夏。加生地。以清解之。

按鄭卞年云。睡眠不穩謂之煩。身體手足擾亂。或裸體不欲近衣。謂之躁。經云。火入於肺則煩。火入於腎則躁。心火旺則腎水虧。金燥惟火獨熾。故肺腎合而爲煩。

躁。出瘡始終皆宜安靜。瘡而煩躁。必其邪毒未解。鬱遏於內。汗既不得。便又不通。以致晝夜不眠。譫語狂亂。啼叫無時者有之。治宜發汗。兼通大小便。經云。心煩躁亂。涼膈快胸堂。又云。疏表透毒。涼解清火去其根。有煩躁而兼氣喘者。火毒在肺也。白虎湯加山梔。有煩躁而兼驚搐者。火毒在心者。導赤散加川連。山梔。麥冬。有晝則煩躁。夜則安靜。此陽邪盛於陽分。白虎湯加山梔。有晝則安靜。夜則煩躁。此陰中之陽虛也。三陰煎。如有火邪。加山梔。有肺中伏火。膀胱絕其生化之源。瀉白散。合甘露飲。有心脾有熱。壯熱不退。痰涎搐搦。而煩躁者。白虎湯加山梔。芩。連。生地。丹參。麥冬。木通之類。或下安神丸。其有煩躁而大便溏利者。此陰虛假熱。肝腎本虧也。五陰煎。其有煩躁而上吐下利者。此脾氣虛弱。不能生金。竹葉石膏湯加陳皮。麥冬。主之。若吐利厥逆。腹脹喘促。譫語狂亂。昏不知人。而煩躁者。謂之悶亂不治。

又按有初熱而先見煩擾。譫妄狂亂者。宜升麻葛根湯。調辰砂益元散。若回後餘

毒未盡。日夜譫妄。煩躁狂亂者。加減四苓散。加芩。連。或調辰砂益元散佐之。按此因毒氣壅盛於內。外被風邪所襲。不能發散於外。故躁亂狂妄。前後皆宜只壳。大黃。利之。

又按譫語。口中亂語也。此因胃中熱甚。上乘於心。心蘊邪熱。則神不安。而發譫語。初起宜用升解散。加菖蒲。遠志。木通。治之。若發熱時。妄有所見而譫語者。或昏睡夢中呢呢喃喃。或狂者。尋衣摸床。此皆毒氣內攻。神舍不清之故。宜升陽散鬱湯。合辰砂益元散。暫以鎮心解毒。若狂言者。狂叫跳動。心火太盛。兼挾肝火。蓋心主聲。肝主怒也。經云。狂言宜退胃火。鄭聲宜安心神。至言也。發狂一症。總因風寒外束。腠理秘密。大腸乾燥。身熱無汗。毒火鬱結。而不得發越故也。初起宜麻黃散加大黃。回後重用石膏。知母。川連。等治之。以能汗吐下爲可救。

煩哭

按出瘡之時。五臟熱毒。自裏達外。則喜笑隨之。倘其時氣粗煩躁。悶亂不眠。或大

小便閉。譫語狂言。面色紅浮。眼張若怒。而啼哭者。是熱毒壅遏於內。而不得發越故也。經云。肝主怒。肺主聲。煩哭者。毒伏於肺肝之中也。將出已出之時。宜升葛湯加羌活。防風。治之。既回之後。宜用石膏。黃芩。川連。山梔。龍胆草。羚羊角。木通。治之。其或食與痰交積胸中而煩哭不絕者。此因胃氣不和。胸膈脹滿之故。治宜涼膈散。或清肺飲加神麴。青皮。主之。其或心腎本虛。邪熱乘虛而入。以致煩哭者。治宜滋陰養血。兼清煩熱。四物導赤散。去芍藥。加丹參之類。其或瘡毒本微。而無故啼哭者。此必飲食內停。或二便不通所致。治宜去其積滯。或通其壅秘。或謂煩哭非痰即熱。而不究其本。則失之遠矣。若煩哭而眼無眵淚。鼻無涕泗。兼之食不知味。口無津液。耳無聽聞。此五竅不通。是毒火鬱遏於內。須要預防逼血妄行。而有失血之症矣。速用清解湯。加石菖蒲治之。

衄血

衄者。火邪熾盛。血隨火載。上行而溢於鼻。瘡症初起。是爲順候。其熱得以開泄。不治

自己。若衄之不止。或失血者。犀角地黃湯。加荆芥穗。正沒及後沒。衄仍不止者。四物湯加茅根。麥冬。以滋降之。

按鄭卞年云。失血者。吐血。衄血。舌衄。大小便血。皆謂之失血。夫血生於心。藏於肝。統於脾。宣佈於肺。輸泄於腎。統而行之者氣也。毒氣既盛。鬱遏於內。不能外達。則氣血交爭。血不能勝。以致經絡內傷。逼血妄行。而因有失血之症矣。經云。陽絡傷則血上溢。陰絡傷則血下行。陰陽絡俱傷。則上下皆出血。惟血從鼻出者。在瘡症則有陽明外達之義。始終無害。蓋因氣盛逐血。血載毒奔行週身。傳注督脈。斬關而出。不犯其內。此謂毒從衄解。未出以前。不必止之。但不宜久。若出盡及沒後。仍然面赤唇紅。鼻衄不止者。此肺肝火盛。當於清肺肝藥中。佐涼血之品。使毒火退而衄卽止矣。加減犀角地黃湯最妙。或加減地黃湯主之。其有瘡回日久。脾肺虛弱。虛火上炎。鼻常流血水者。宜用滋肺飲。又有肺腎不交。鼻常流血水者。以致身體乾瘦。心忪氣弱者。宜加味地黃湯。若大便失血。乃毒不歸臟。從府而出。雖不致

有大害。恐久成孤惑。休息痢之症。急用加味四苓散。如肺經有熱。流入大腸而便血者。宜用清肺飲。血裏糞而出者。此大腸有熱也。宜用加減涼膈散。若小便溺血。此因肺熱流入小腸。宜用利金湯。或犀角地黃湯。加山梔。車前。石韋。木通。槐花之類。至舌衄亦多有可救者。蓋舌爲心苗。血出於舌。則心火稍洩。前方可治。至吐血及耳目出血。此毒火內攻。臟腑已敗。皆不治之症也。凡瘡子回後。忽見血症。大爲危候。蓋鼻血出於肺。吐血出於胃。溺血出於小腸。便血出於大腸。皆由熱毒內盛。迫血妄行。急宜涼血地黃湯止之。服藥後。血不止者不治。

瘡

肺胃熱邪。爲風寒所襲。不能盡達於表。欬盛咽傷。故瘡。宜清咽滋肺湯。若瘡而腫痛者。射干消毒飲。然瘡爲瘡症之常。不可與痘瘡比例。

按鄭卞年云。咽者。胃管。主納水穀而居前。喉者。肺管。主司呼吸而居後。是咽與喉。乃一身之橐籥。猶國家之關津。宜通而不宜塞也。苟瘡毒內壅。不能發越。上炎而

鎖於咽喉。其時或燥或痛。或破或腫。或水入則噎。食入則嘔。或音啞失聲。舌強難言。最爲惡候。初起速宜甘桔湯。加大力子。荆芥。元參。前胡。旋覆。等藥。解散毒火。清利咽喉。至回後重用山豆根。射干。防風。麥冬。石膏。苦參。杏仁之類。如熱甚痛甚者。宜黃連解毒湯。加射干。山豆根。大力子。甘草。木通。若大便閉。加只壳。大黃。微利之。或四順清涼飲下之。凡咽喉腫痛。渾身壯熱。大小便閉。或口舌生瘡。不能飲食。宜加味鼠粘子湯。外以玉鑰匙點之。經云。咽喉切要解炎梟。喉痺咽瘡毒火燒。祇恐一朝封管籥。錯喉聲啞却徒勞。

音啞

心者。聲之主。丹田者。聲音之府。喉嚨者。聲音之門也。被熱毒煎熬。熱能生痰。痰毒填實肺竅。則津液膠涸。有礙氣道。其毒不能盡行肌表。故音啞。蓋脾與肺相連。肺竅既被填實。不能外達皮膚。則聲音自不能發越也。五行肺屬金。金空則鳴是也。始宜大力子。桔梗。元參。花粉。甘草。石菖蒲。生黃芩。麥冬。知母。勾藤。川貝母。天麻。前

胡等藥。以清其毒。活其痰。則肺竅開。而聲音出矣。大凡痘瘡始終要音聲清朗。如發熱之時。卽咽喉失聲者。寒戰咬牙者。煩躁昏迷者。痰氣喘急者。乾嘔噎水。錯喉者。腹脹悶亂者。此皆風寒外束。毒氣內壅之故。皆凶候也。速用麻黃湯發之。如久瀉後。音啞汗出如油者。元氣脫也。不治。惟咳嗽失聲者。不在此例。如瘡回一月外。可用沙參。訶子。阿膠。糯米等味。經云肺斂則音開。是也。若音啞日久不愈。可服通音煎。音啞一症。有肺熱者。有肺痿者。有寒包熱者。有風毒入肺者。有蟲入肺者。有舌強痰迷者。各宜因症施治。聲音不宣。痰出鼻竅。上焦肺氣壅塞者。宜辛涼以宣之。薄味以清之。枇杷葉。薄荷葉。桑葉。杏仁。大力子。甘草等味。要午前服。

口氣

口氣穢濁。乃熱邪蘊隆於胃。清胃散加石膏。連翹。生甘草。其有臭不可聞者。此胃敗也。不治。若其人本有是症。不在此例。

按鄭卜年云。口中腥氣。勃勃衝人。是肺中火邪煎熬。馴致潰爛故也。比症或失聲。

或喘息。或乾嘔。或吐膿血。皆其候也。宜清金瀉火湯主之。又按嗽而臭者。肺胃有故。不嗽而臭者。口中有故。或因初起失表。表實毒氣內外壅遏。不能透發。毒傳脾經。以致胃熱口臭。治同上。

舌胎

舌者。心之苗。瘡本火候。心屬於火。故舌多有苔。白爲肺熱。黃爲胃熱。但當清解疏利。更參外症而爲施治。純黑爲心絕黑。而濕者熱淫血分。黑而燥者熱淫氣分。皆爲危候。並宜白虎湯。濕者加生地。元參。燥者加麥冬。竹葉。黑色漸退者吉。不退者危。

按鄭卞年云。口爲脾竅。舌爲心苗。口舌生瘡。必因餘毒未盡。而熱壅上焦也。其時大便若閉。小便若赤。宜清利心脾之火。兼潤大腸爲急。清上飲主之。萬氏云。口舌生瘡。有赤白之分。赤者謂之赤口瘡。此熱在心脾二經。服洗心散。白者謂之白口瘡。此熱在肺二經。內服洗心散。一說服陰陽散外以硃礬散敷之。如症兼煩熱不止。咽喉疼痛者。用川連解毒桔梗湯。再用清金散搽之。舌上生胎。是脾胃熱閉。

出血是心火拂鬱。腫脹是心脾火毒。瘡裂是上焦熱盛。木強是風痰濕熱。口糜是膀胱移熱於小腸。口臭是胃火食滯。喉腥是肺火痰滯。

又按舌苔如刺。咽乾如炙。傷寒雜症見之。亦陽盛陰虧之象。扶陰抑陽。其症自愈。瘡症見此。分而言之。咽乾乃金受火尅。不能生水。以致水虧。火炎於上而咽乾如炙也。舌刺。腎水刑尅心火。而津液不能上榮於口。故舌如芒刺也。合而言之。總是烈毒肆虐。上蒸咽舌。而爲刺爲乾也。速宜寒解蕩滌。滋水生金。稍後莫救。黃連解毒湯。合甘露飲。加石膏。瓜萋。只壳。大黃。治之。如舌刺如煤。咽乾如割者。不治之症。用大黃。瓜萋仁。各一兩。只壳一兩。石膏三兩。

口疳

牙疳腐爛。是熱留陽明。餘毒上衝所致。加味清胃散。加石膏。荆芥。大便秘者。當歸散。微利之。外用栗根白皮。煎湯漱淨。以無比散。或燒鹽散。吹之。如通齷色白者。自外延入內者。無膿血者。齒落口臭者。喘促痰鳴者。皆爲不治。若滿口唇舌黃赤白爛。獨牙

齦無恙者。此爲口瘡。非牙疳也。亦胃中餘熱未盡。毒壅上焦。二便必多艱澇。導赤散以瀉心脾之火。外敷綠袍散。

按鄭卞年云。陽明之脈入上下齒齦。則凡瘡後上下牙床紅腫。以至牙齦黑爛。血出齒落。臭氣衝人者。皆因陽明之毒。未能盡解。積久不散。故結而成疳也。其名爲走馬者何也。此因移熱於腎。腎火直走上焦。助胃火而上走齒中。故曰走馬牙疳。治宜清利脾胃之火。兼清肺腎。清胃飲。或涼膈散。外以馬鳴散吹之。或白虎湯加大力子。或甘露飲治之。若上下唇破。鼻穿齒落。氣喘食少者。名曰崩沙。速用沉瀝丹救之。或蘆薈消疳飲。又按宜清胃散加知母。石膏。或清肺飲加荊芥。大力子。元參。甘草。桔梗。又按脾胃虛熱上炎。薰蒸於口。口流清水。是爲口瘡。口瘡日久。遂流血水。血聚成膿。爛黑臭穢。是爲沙疳。治宜內金散加絨綿散。

目

瘡子發熱之時。眼光如水。而多眵淚。或白睛微紅。此正候也。若沒後猶見紅赤。爲肺

經風熱未盡。瀉白散加荊芥薄荷。元參。大力子。閉不欲開。更加連翹。木通。赤而腫痛者。風熱上壅也。導赤散加荊芥。大力子。元參。若爲風熱所侵。而眼眶赤爛者。柴胡飲子。急須治之。否則爲終身痼疾。

按鄭卞年云。目者五臟氣血之精華也。毒之鬱滯於肌膚者。爲癰爲節。而其留滯於精華者。則發爲目患矣。但五臟各有所屬。眼白屬肺。黑珠屬肝。瞳神屬腎。兩眦屬心。眼胞屬脾。五色各有所主。心主赤。赤甚者心熱也。肝主青。青甚者肝熱也。脾主黃。黃甚者脾熱也。故凡目內紅赤者。是心經積熱上攻。宜瀉丙火。從小便而出。導赤散加黃連。防風。主之。目內老黃者。是脾經積熱上攻。宜散脾火。瀉黃散主之。上下眼胞腫甚者。是脾經風熱也。宜導赤散加荊芥。生地。紅花。僵蠶。主之。大凡目病。在表宜疏風兼清熱。或內外下淚難開。宜清熱兼疏風。清陽散火湯主之。加升麻。黃芩。其有眼內有筋縈纏。或紅腫難開。多生眵淚。或星翳羞明。痛如刺觸者。此火邪本於五臟。而熾及三陽。火之最烈者也。宜急瀉心肝之火。以免喪明之患。蟬

花散清解之。或加菊花。羌活。荆芥。川芎。桔梗。條芩。車前。木通。升麻。白蒺藜。麩仁。之類。經云。兩目紅腫。羚羊。荆芥。爲先。菊花。羌活。木通。連翹。次之。又云。毒火發露在表。又在至高之地。宜用麥冬。清肺飲。主之。若瘡後日久。面色青白。骨瘦不堪。元氣損傷。肝脾血少。而成痞眼。懶睜畏明者。宜六味地黃丸。加減。一切疏風之藥。不可妄投。

腹痛

腹之痛由不一。總爲火毒內鬱。或風寒壅遏。或飲食停滯。皆能致痛。於發熱正出時。風寒壅遏。毒反內攻而腹痛。急與疏表。瘡透自己。若飲食過傷。腹滿脹痛者。力爲消導。其痛自除。當正沒時。及沒未盡而腹痛者。兼清中外。而痛自止。沒後見者。分利餘熱。其痛自愈。又須驗其有無他症。屬虛屬實。而與治之。若熱邪內結。而腹痛者。通利大便爲主。有瘡後脾氣不調。而致腹脹。面目四肢浮腫。分利小水爲要。至若元氣大虛。陰陽不能升降。小水不利。遍身浮腫。喘促兼見者。難治。

按鄭卜年云。凡出瘡多有腹痛之症。此因毒未出盡。鬱於脾胃。滯泥不通。以致邪正交攻。藏氣相擊而作腹痛。或因大腸之火。鬱於皮毛之中。亦作腹痛。腹痛者。總由毒鬱三陰也。臍以上屬太陰。當臍屬少陰。小腹屬厥陰。治宜升發解利。然發熱時腹痛如觸者。若審無風寒外寒鼻塞等症。此必毒擾於裏。如大便秘結。速宜攻下。初出正出之時。是毒尙未透。治宜疏托。羌活散鬱湯。及回後法。宜解利。清解散。加只壳。大黃。利之。其有大便秘結。忽然腹痛者。此留滯燥糞欲出。宜用蜜煎導法。若平日本有虻痛。今因內熱熾盛。虻不能安。而作腹痛者。此必手不可近。摸之一塊高起。治宜只壳。大黃。瓜蒌。川連。等藥利之。卽愈。切勿用史君子。檳榔。酸收之藥。致令咳嗽不已。如面黃唇白。多眠畏食。大便酸臭。拒按。此食積痛也。宜消積丸下之。若面赤壯熱。四肢煩躁。手足心熱。此挾熱痛也。宜導赤散加山梔。青皮。只壳。或梔子飲主之。

附腰脇疼痛

毒伏於腎。腎繫於腰。腰者一身之大關節也。毒火煎熬。腎水枯竭。不得既濟。故腰痛耳。更有痰熱流注。以致小便黃赤。腰痛不得俯仰者。初起宜用敗毒散。回後即宜疏肝氣。消痰熱。柴胡清肝散。加胆星。羌活。防風。主之。其有日輕夜重。大便黑。小便黃。轉側如錐刺者。瘀血也。治宜順氣活血。元戎加減四物湯。或加桃仁。紅花。主之。兩脇者。陰陽之道路也。由餘毒在中。陰陽之氣。不得升降。故作脇痛。治宜柴胡。只壳。赤苓。青皮之類。使二氣流行。而痛自止矣。然有因熱痰流注而痛者。有因食積痰滯而痛者。治宜清熱清痰。疏氣消食。若感冒風寒。必見頭痛鼻塞。發熱惡寒等症。初起固宜發散。即回後亦宜覆取微汗。按脇痛多是肝木有餘。宜小柴胡湯加青皮。川芎。龍胆草。主之。其有挾熱挾痰。挾食氣滯者。宜隨症加味。

手足痠痛

瘡出之後。被風寒邪氣所侵。或肩井手臂脚踝。以致毒火凝滯。不散。痠痛無時。甚至動搖不得。後必生癰疽瘡癤等疾。須降藥中加羚羊。青皮。桔梗。獨活。川芎。玉柳。

治之。如痰飲流入四肢。以致手足疲軟痠痛者。若誤以爲風。則非其治。宜導痰湯加木香。片子薑黃。或酒炒芩。連。若痢後爲亡陰。宜歸地等補血。

肢節腫痛

痛屬火。腫屬溼。總因瘡毒爲風寒所鬱。而發動於經絡之中。溼熱流注於肢節之間。而無已也。治宜微汗。先以發散。麻黃湯主之。其或腫而不痛。症兼惡心頭眩者。此因溼熱流注而腫也。宜滲溼清熱。蒼朮二陳湯加酒芩。山梔。二活。竹瀝。姜汁。治之。其或痛而不腫。症兼口乾煩躁者。此因毒火流注而痛也。宜清火和血。四物湯去芍藥。易生地。加酒芩。黃柏。知母。等味。或加地骨皮。

頭目腫

毒氣發越。聚於三陽。故頭目掀腫也。宜用羌活。防風。大力子。荆芥。連翹。柴胡。川芎。桔梗。石膏。白芷。等藥。升散解毒。又有一種初起增寒體重。次傳頭面腫甚。目不能開。氣喘上逆。咽喉不利。舌乾口燥。俗云大頭時行。此因邪熱客於心肺。上攻頭目。

宜普濟消毒飲。或加大黃。

水腫

諸腫皆屬於脾。瘡後脾土有傷。運化失職。所有清濁混淆。鬱而爲水。滲透經絡。窒礙津液。久之血赤化水。而成脹病。治法宜實脾胃。清肺金。使全運化之職。然後肺氣下降。通調水道。爲血爲水。爲津液。各遂其流矣。又有溼熱內攻。或下注心腹。脹滿。小水併入大腸。以致小便不利。大便滑洩。而成水腫者。此毒入三焦膀胱之故。宜滑石。甘草。豬苓。澤瀉。赤苓。木通。車前。黑山梔。黃柏。黃芩。瞿麥。等味。以清三焦及膀胱之熱。

陰囊腫痛偏墜

膀胱內通腎臟。厥陰肝木。乙癸同源。二經有熱。則小便或赤或秘。兩丸俱光浮腫。燥痛不可着手者。名曰陰囊腫痛。此因餘熱流注膀胱。治宜內服加味導赤散。外以黑消散塗之。其或瘡後性急。煩哭。怒氣不順。以致囊丸一邊偏大。名曰偏墜。此

因腎不納肝之故。治宜行氣開鬱。先服柴苓湯升散之。次用加味二陳湯。或抱龍丸。和其肝氣。若囊丸雖腫而不熱不痛。此由中溼下陷所致。治宜行溼消腫。加減守病丸主之。又有小兒陰囊生瘡潰爛也。謂之脫囊。外用紫蘇葉研末敷之。再以荷葉包之。雖兩丸露出。亦可治也。

腹脹

腹脹一症。在將出正出之時。此因毒氣留滯於內。而不能透發。或外被風寒所束。而不得汗洩之故。治宜升發解利。使內毒分消。則腹脹自愈。麻黃湯主之。若回後。或因毒未盡透。薰蒸臟腑而腹脹者。銀花解毒湯。或因乳食不節。有傷生冷。而腹脹者。加減平胃散。或唇口燥裂。手足病疲。兼大腸秘結者。此脾熱生脹。升麻石膏湯。或嘔吐不食。壯熱咽乾。小便赤澇。此胃熱生脹。白虎湯加芩連。山梔。木通。若四肢乾瘦。肚腹脹硬。夜間發熱。或出盜汗。此元氣虧損虛脹。天真膏主之。此必瘖回日久。方有此症。

癖積

瘖既回後。宜節飲食。若飲食迭進。不知禁忌。或食難化之物。以致陽明胃氣。一有所逆。則陰陽之氣。得以乘之。而脾不及化。再加驚嚇因之。積聚成病。久之。再因痰氣包裹。遂成癖積。於左脇膈膜之外。或時作疼痛。或時發潮熱。或寒熱往來。似瘡面黃肌瘦。項細脚軟。腹脹痰喘。有所不免。凡遇此病。當以漸消磨。求法治之。慎勿猛浪欲速。妄行攻伐。徒致胃氣受傷。積仍未化。以速其禍也。體素弱者。香砂六君子。主之。或合蝼子丸。氣壯實者。消癖丸。按此皆因瘖後臟腑未和。津液不得流通。飲食不謹。冷氣搏之。結聚成癖矣。輕者漸消。補脾。重者。補脾中合白玉餅下之。

便秘

大便秘結。火壅血燥而耗津液。瘖症大非所宜。無論日期前後。速宜清順。四順清涼飲。甚則涼膈散以通利之。慎勿遲延。恐瘖變焦紫而難救也。大抵瘖症。自出至沒。二便俱不宜秘。秘卽微利可也。

按鄭卜年云。有血熱毒重而秘結者。有陰虛血燥而秘結者。口乾腹脹。壯熱煩躁。目赤狂亂者。此血熱毒重而秘實也。仲景所謂陽結是也。宜清金降火湯爲主。嘔噦不食。唇白面白。肚腹不脹。而又無裏結後重等症。此陰虛血燥而秘虛也。仲景所謂陰結是也。宜滋陰涼血爲主。

溺瀉

小便赤瀉。在初熱正出時。熱邪瀉滲。是爲正候。沒後見之。爲餘熱下陷膀胱。導赤散加麥冬。以滋氣化。利之仍不通者。必大便秘鬱之故。大便一通。小便自利。

附尿如泔濁

瘡後初便黃赤。落地良久。變作泔濁者。是爲尿白。因脾胃溼熱所致。宜加減胃苓散主之。小便出時。色白渾濁。隨尿而來者。名曰白濁。此係心膈虛熱。宜加減清心蓮子飲主之。又出瘡之時。小兒乳後即哺。哺後即乳。以致清濁不分。而色如泔濁者。此因心肺伏熱。有傷脾胃所致。將來漸成疔瘰。急用三稜散治之。或加減四苓

散治之。如因肝腎火盛。熱移膀胱者。必兼瀉痛煩熱。宜龍胆瀉肝湯主之。若但見白濁。而別無煩熱等症。則但節其生冷甘甜等物。不久自愈。切不可因其溺白。而過用芩連山梔之類。致傷脾胃。而反成吐瀉等症。

痢

瘡之作痢。爲熱邪內陷。在正沒或沒後。而痢下色白者。黃芩湯加防風。只壳。下膿血者。白頭湯去黃柏。加防風。或因食積而滯下者。枳壳湯加山查。黃柏。木通。腹中作脹。時痛時止者。厚朴湯。亦有瀉久而成痢者。乾薑黃芩黃連人參湯。自始至終。痢不徹者。必有風毒留滯於內。則宜解毒行滯。而兼疏風實脾。庶幾克應。如痢下紫黯。如癰膿如屋漏水。如鷄肝色。如黑豆汁之類。加之氣喘躁渴。熱甚發呃。噤口不食。瘡色紫晦者。皆死不治。

按鄭卞年云。瘡後餘毒未盡。熱毒移於大腸。故成痢症。又有回後食物不慎。風寒不避。傷壞脾胃。遂傳於肺。肺與大腸相表裏。亦成痢症。瀉痢日久不愈。名爲休息

痢。或腹痛。或裏急後重。或便膿血。亦皆由肺毒未清。歸於大腸之故。治法皆宜升表開提。大忌止瀉之味。雖元氣未復。脾胃虛弱。不得輕用黃芪。致令不救。惟用黃芩湯以熱其湯。合天水散以分其勢。合用地榆湯以涼其腸。解其毒。而瘡痢自愈矣。又有痢下稠涎。赤白相兼者。須用解毒。再有看手。摳咬指甲。撕口唇皮。及咬人等症者。更當以解毒分利並治。若痢變煤色。或屋漏色。或如青菜色。肛門如筒。喘促音啞。飲食不進。午後腮紅。發熱。皆不治之症也。瘡當見形之後。便下膿血。或因泄瀉。而變成膿血。或兼裏急後重者。只宜表瘡。俟其瘡回後。方宜解毒中。佐以涼血之藥。經云。行血則便膿愈。調氣則後重除。他如純下清血者。風傷肝也。宜散風涼血。滋陰潤燥湯主之。痢下如荳汁者。溼傷脾也。宜清熱滲溼。猪苓湯主之。地榆散黃連阿膠湯俱可用。且有下鮮血者。爲腸風隨感而見也。按鮮血爲熱。自大腸氣分來。下瘀血者。爲臟毒積久而發也。瘀血爲寒。自小腸血分來。腸風是風邪留胃。臟毒是溼邪淫胃。槐花散主之。糞前來者爲近血。出於腸胃。糞後來者爲遠血。

出於肺肝。若嘔吐不能食者。名噤口痢。宜用生地。歸尾。芩。連。甘草。丹參。只壳。之類。治之。或用石蓮肉爲末。米飲下一錢。

睡

瘖正出時。精神困倦。沉睡不醒者。爲逆。蓋緣正氣虧損。邪火內鬱。正氣不勝所致。若沒後而沉睡不醒者。爲氣血俱虛。補養脾胃爲要。如沒後煩擾。而反不得寐。是餘火復燃。急需滋陰養血。陽氣自斂。亦有昏睡不知起止。掐其夾車合谷。不知疼痛。似寐非寐。無問正出沒後。良非吉兆。當察其兼見何症。而與施治可也。

按鄭卜年云。昏睡者。謂昏多而醒少。不知人事。掐其夾車合谷穴而不知也。前後皆凶候也。沉睡者。謂睡則沉沉而少醒也。正出未出之時見之。此鬱火得退。本爲吉候。卽回後見之。乃毒氣已解。元氣將復。故邪退而神安。是否極將泰之象。亦爲吉候。不必服藥。如見寂然氣虛。先宜貞元飲治之。或加人參亦可。凡回後昏睡。連日不醒。口中妄語。卽有醒時。亦如醉人。每多錯語。此熱邪攻心。心不受邪。傳於包

絡宜導赤解毒湯清之。或用安神丸亦可。

不食

不食是胃中邪熱熾盛。不可強與。雖數日不食。亦無妨害。在初發正出時。白虎湯加荊芥。瘡透熱清。自能食也。沒後不能食。石斛清胃散。量加健運之味。元氣委頓者。急需培補。防有虛羸之患。

按鄭卞年云。凡出瘡多有不食。蓋因胃爲邪氣所侵。故不食耳。只宜升表。待瘡盡出。毒氣解散。自然漸思飲食。如回後仍不欲食。是熱毒犯胃。其時必渾身發熱。咳嗽嘔惡。昏煩躁亂。經云。胃熱人煩。體自炎是也。治宜清胃飲。合白虎湯。重用石膏。倘大便閉結。須加大黃清利。不憂寒涼太過。蕩滌傷胃。亦有飲食過多。食傷胃氣。或痰凝氣滯。或外感風寒。邪入胃口。或暑熱干犯。皆令不食。當臨症細辨。

身冷

瘡爲肺胃邪熱所發。本屬於陽。肢體常宜溫暖。若反清冷如冰。是爲逆也。其有沒後

遍體清涼如故。獨下體厥冷過膝者。爲腎敗不治。如初出腰以下不熱。毒不能透。而反漸沒者。亦爲逆候。急當溫養脾胃。或有得生者。

按鄭卞年云。厥冷者。陽氣獨上。火隨痰湧。氣塞不行。而厥冷也。又有熱毒之氣。鬱遏於內。元氣不得流通。以致表上無陽。而厥冷也。宜升葛湯加麻黃。桂枝。葱白。且有陰虛火旺。內熱生風。火氣薰灼。故身熱支滿。痰隨火湧。不知人事。而厥冷者。宜滋陰降火爲主。若汗出過多。血隨小陽氣獨上。塞而不通。此血厥也。

附寒戰

瘡子寒戰。因心火亢極。上薰肺金。而孔竅閉塞。欲出不出。留連於腠理肌膚之間。故寒戰不止。宜發汗以去表熱。如大便閉宜下。小便濇宜利。論火性甚烈。喜散而

不受鬱遏。鬱遏則拂其性矣。欲達而不達。氣血與毒火。五內搏激。其能免於不戰振乎。戰振。火之象也。火鬱固戰。過鬱則寒。是熱極反見水化也。治宜柴葛桂枝湯加麻黃。以先達其鬱。庶火鬆毒透。身必熾熱。火性得順。而寒戰自止。

寒熱

火鬱則寒。火動則熱。寒熱者。蓋毒火有隱見之分。非真有寒熱之介也。故熱如炮烙者。毒見於表也。寒至振動者。毒隱於裏也。要之將出而有者。氣血與毒火相攻擊也。羌活散鬱湯。將回而有者。毒盛邪勝。氣血未和也。消毒飲。加柴胡。石膏。黃芩。地骨皮。如便秘。加枳殼。大黃。微利之。其或寒熱往來。日重夜輕者。此邪在陽分。治宜輕解。日輕夜重者。此邪在陰分。宜滋陰升散。寒邪在表。大熱無汗。邪正相爭。而爲寒爲熱者。此似瘧之類。但散其邪。而寒熱自止。不可作眞瘧治也。柴葛湯主之。其或寒極似熱。熱極似寒。且發熱有溫有壯。有潤有燥。燥有劇有未劇之不同。須當臨症細辨。有寒熱並作。頭痛背強。升麻湯加羌活。

表裏實熱

肌膚大熱。瘡色紅紫。乾滯黑黯焦枯。或面赤唇紫。手足熱甚。或發斑丹。此皆火在肌表。實熱之症也。治宜清涼發散。解毒爲要。而分利次之。若二便閉結。胸膈脹滿。

唇焦咽乾。煩躁狂言。大渴引飲。氣喘氣粗。衄血溺血。此皆火在臟腑。實熱之症也。治宜重於解毒。而兼清涼發散。

瘡後瘡疾

其症初起。呵欠煩悶。發熱口渴。頭額有汗。汗出其熱稍退。久之復熱如故。喉中痰鳴。一哭卽嘔。嘔則痰出。每日如此者。瘡之症也。此因回後肌肉尙嫩。洗之太早。溼熱水氣。客於皮膚。以致衛氣不守。邪氣併居。陰陽交爭。陰勝則寒。陽勝則熱。初起先用透肌湯。如唇紅煩躁作渴。寒少熱多者。宜用清瘡飲。或加味石膏湯。有一種熱瘡作瘡。總宜和解表裏。分利陰陽。則瘡邪霍然而散。切不可認爲驚風。徑施鎮墜。以致邪正搏激。久之神情潰亂。宜用清脾飲解之。其瘡自止。若瘡久不愈。或爲藥餌所傷。後來腰痛腿酸者。宜六味地黃湯。如熱多寒少者。加黃芩。酒炒常山。寒多者加桂枝。

痘瘡相連

痘見形之後。有碎密如芥子者。瘡也。此因火毒薰灼於中之故。宜速解毒。使瘡消散。痘得成功。經云。痘瘡連呈甚是奇。夾斑夾瘡總非宜。瘡消痘見先解毒。知母芩連石膏齊。又云。瘡先痘後小兒災。瘡退方能痘自來。莫道寒涼憂冰伏。時師一見便癡呆。又云。治瘡不治痘。惟要開其腠。腠開毒自出。毒出爲寧候。按痘夾瘡子。乃肺經之熱。痘初起時。與落茄時夾之者輕。灌漿時夾之者重。見而遂退者吉。久留者凶。蓋灌漿之時。用溫補助漿則礙瘡。用清涼治瘡則礙痘故耳。如見瘡已出足。用升麻石膏大力子元參黃芩黃柏荆芩防風生草等味。先退瘡毒。痘瘡自然發起矣。心鑑曰。痘本稀少。而與瘡相連者。名爲瘡夾痘。其症輕。若痘本稠密而加瘡以相混淆。些碎莫辨。其症凶。故治痘瘡相連之法。先當察痘之稀密。瘡之微甚。瘡輕者。但當以痘爲主。瘡重者。卽當急解瘡毒。痘瘡俱重者。亦必先解瘡毒。使瘡散而痘可無慮。若瘡不散。毒不解者。難治。內熱毒甚。消毒飲合黃連解毒湯。陽明火甚。熱渴煩躁。白虎湯化斑湯。表邪未解。外熱內不熱。荆防敗毒散。表裏俱熱。解毒

防風湯。

瘡夾斑丹

瘡子初出。有點點如蚊咬之狀。而無顆粒者。斑也。而片片紅腫。如錦紋雲塊者。丹也。斑與丹。皆由熱毒鬱於血分之中。則血熱太過。而氣有不及。以致營衛失護。而任三焦浮游之火。散漫於皮膚之間耳。此皆足陽明胃經所主。治宜清輕散其火邪。兼之涼血解毒。並先用元參升麻湯加石膏。丹參。紫草。或合白虎湯。亦可。如因風寒外感。表邪未解。而夾斑丹者。宜荊防敗毒散。或加石膏。元參。治之。如瘡已收。回。而見斑丹者。此餘毒煎熬血分。必致潰爛。宜黃連解毒湯。加石膏。知母。紫草。丹參。治之。若熱毒薰蒸於內。而大便臭穢不堪。或下膿血者。此胃爛發斑。不治之症也。治亦不過大劑白虎湯。用石膏一斤。知母六兩。甘草二兩。粳米六合。煎茶常飲。或有得生者。

斑症

宋成雲片。如錦紋者。爲斑。此因胃火熱盛。冲入少陽胆經。則助相火而成斑。又毒氣壅遏。榮血不能流行。亦發而爲斑。斑有血點而無顆粒。摸之不礙指者也。初發常在肚脇腰背大腿間。斑乃太過之症。比瘡更重。夾毒上浮。從毛竅中滲出。如蚊咬之狀。而色紫赤。宜清胃熱。並涼肝胆。法用石膏。生地。丹皮。丹參。連翹。大力子。荷蒂。川連。川芎。羌活。防風。荆芥。山梔。生甘草。大黃等藥。然有血熱發斑者。此因六經火盛。熱逼而成斑。急用解毒化斑湯。有熱閉發斑者。此因未瘡之先。胎毒惡血。藏之於內。忽發大熱。毒盛元虛。血爲熱閉。不能發於四肢肌肉。乃於腹脇軟便毛竅處。滲出血點而成斑。有血逆而發斑者。此因未熱之先。或遭跌蹶。或因被杖。乃卽發熱。臍下發稜角斑者。是也。宜用破逆化斑湯主之。有胃爛發斑者。此因胃火熾盛。內已腐爛。口必大臭。宜白虎湯常飲。再用化斑湯救之。有元虛發斑者。此因小兒元氣大虧。感時氣出瘡。而不能勝毒。則血爲火逼。渾身毛竅滲出血斑。此氣離血散。治之無益。若單見兩脇者。尙可治。又有陽毒發斑者。其症壯熱煩渴。兩目如

火。狂言嘔吐膿血。此或因當汗失汗。當下失下。或下之太早。邪熱入胃。或下之太遲。熱留胃中。不能洩下。是皆內外夾熱而發斑也。宜用元參地黃湯。合白虎湯。加犀角黃芩。治之。若回後餘毒煎熬氣血。而發紫紅斑。此謂餘毒發斑。其斑必爛。宜消斑解毒湯。加丹參黃芩石膏。甚則用大連翹飲。外用生肌散敷之。至陰症發斑。其時身無大熱。手足指甲皆青。其色微紅。此無根浮游之火。聚於胃。薰於肺。傳於皮膚而爲斑也。若妄投涼劑。則誤甚矣。宜補以降之。其火自下。斑自退矣。此類甚多。須臨症詳參。

發丹

丹者。紅赤成片。形如丹砂。或如雲頭突起。或如紅蛇纏繞。形雖不同。色則一也。此症總因毒盛。心火梟炎。血熱以致游散於肌膚間也。不可遽用涼劑。亦不可妄用涼藥塗敷。恐毒火反入於裏。則難治矣。宜用六味化丹散。以清心脾鬱蒸之毒。用生地防風湯。以除肌膚蟻結之患。頗稱妙法。誠良方也。凡發丹因蓄火太甚。不能

發洩。鬱於肌肉之間。故發而爲丹。從頭上起。過心卽難治。從足下起。過腎卽難治。急服元參解毒湯解之。外用磁鋒砭去惡血。

胃爛發斑

回後。或因傷寒當下不下。宜汗不汗。以致熱毒鬱遏於內。煎熬陰血。血極熱而不解。則胃受熱毒。而發於皮膚之間。色赤者。謂之胃熱發斑。色黑者。謂之胃爛發斑。其時胃火熾盛。內已腐爛。口氣大臭。站立不起。腰痛腹痛。眼白赤紅。舌起黃苔。或大便膿血。臭穢難聞。脇下有斑者。不治之症也。大劑化斑湯。或白虎湯。石膏數兩。間有得生者。

發泡

經云。血積則斑。氣盛則泡。氣盛者。毒盛也。沖突處毒鋒如射。櫻其鋒者。囊隨毒起。此泡之所由發也。而泡又有紫白紅三種。紫紅泡者。起於化機傳肝。表裏未解。致血熱鼎沸。宜黃連解毒湯。加犀角。生地。紫草。丹皮。山梔。木通。治之。瘡未足者。忌用。

白泡者。乃氣有餘。血不足也。化機傳肺。熱毒注於皮膚之間。其瘡液亦隨氣而爲泡也。白而空者。其氣尙虛。白而有清水者。其氣實也。治宜川連。石膏。黃芩。丹皮。元參。僵蠶。連翹。生地之類。又云白泡亦是氣熱之故。又云脾溼之故。腎水盛耳。總由熱毒未出。經云。血熱則枯。血涼則生是也。

癩疹

癩疹多屬於脾。以其隱隱在皮膚之間。發而多痒。或遍身紅者。或不紅者。俗人名爲風丹是也。此因瘡毒未盡。留於皮膚。或因風火相搏而成。或因身痒爬搔而成。皆吉兆也。蓋正欲其發洩。毋使停留。以變他症。如出之太甚。治宜內服荆防敗毒散。外以益元散拭之。如痒不可當。必以瘡出未收之時。外被風邪。襲於皮毛而入肺。肺中毒氣。合而復發於兩脇背胸腰腿之間。治宜消風散。

瘡癢

按瘡出遍身作癢。爬搔不寧。此瘡之毒火。傳於肌膚之間。不能卽出。與夫傷寒汗

不出而作癢者同。况諸瘡癢痛。皆屬心火。經云。癢者火之變症也。又肝主風。爬搯不寧。風使然也。心肝二藏之症。消風化毒湯主之。

發癢

熱毒壅於皮膚。氣非不足。鬱遏則陷於無用。血非自熱。煎熬則迫其遊行。血味且鹹。遊行皮肉。癢之所以作也。然有血熱發癢者。有毒氣發癢者。有觸穢發癢者。總宜消毒散加防風。荆芥。連翹。元參。蟬退。地骨皮。黃芩。生地。等藥治之。或重加生地。石膏。涼血解毒。以殺其熱壅之勢。否則疏風以開其腠。佐攻毒以達其滯。庶氣血不受邪虐。而癢自息矣。若見內症猖狂。大便秘結。速宜用大黃。麻黃。枳壳。以蕩滌之。不可臨渴而浚井也。又有浴法。用升麻。茅朮。桑皮。防風。荆芥。柳枝。槐枝。煎湯。以布拭之。

瘡後遍身糜爛

瘡已收後。飲食太過。致令食傷脾胃。脾主肌肉。背心兩脇間。發出水晶小泡。名曰

水晶疹。一日之間。變成漿泡。如沃湯然。潰爛成糜。治宜胃苓湯。外用寒水石錦大黃等分。蜜水調敷。或密陀僧赤石脂生石膏研末敷之。

遍身紫黑紋

此熱邪內外發蒸。遇風寒折之。與內熱相拒而不得入。內熱爲風寒所閉。而不得出。毒氣壅於肌表故耳。其色青紫。形如痣點者有之。宜用生地。丹皮。紅花。凌霄花。元參。連翹。芩。連。石膏。紫草。全蝮之類。如便秘。加生大黃利之。

瘡後瘡恙

瘡後發瘡。多緣生水。澡浴太早。水氣留泊肌腠而發。但須日以荆防艾葉煎湯洗之。勿用水洗。亦不可用瘡藥熏塗。失治。必每歲依期而發。慎之。

虛羸

瘡患既平。形體羸瘦。精神倦怠。飲食減少。或咳嗽不止。或便泄不已。或身熱不除。皆真元虧損。恐成勞瘵。並宜雙和湯。去川芎以和之。嗽加橘紅貝母。欬加麥冬百合。瀉

加白朮扁豆。食難孚化。加砂仁穀芽。氣血俱虛。合四君子湯。隨症調之。切禁寒涼傷犯脾胃之藥。專力滋培。緩圖平復可也。

妊娠

瘡屬火候。最易墮胎。若初發正出時。須驗其色之紅淡。熱之重輕。而與疏解。疏解之中。佐以清涼滋血。安胎爲主。四物湯加條芩。艾葉。荆芥。紫蘇之類。若胎氣上衝。急用苧根。艾葉。煎湯。磨檳榔。續進以降之。一切實脾行氣。溫燥之藥。既礙瘡子。復傷子氣。咸須禁之。

附婦女行經及胎前產後出瘡

按婦女發熱之初。經水適來如期。此積瘀得去。毒隨血解。勿藥可也。若過四五日。而仍然不止。是毒入血室。逼血妄行。爲內奪中虛之症。宜用涼血地黃湯。加丹參。以清血海之熱。有非其期。而經水忽行者。是毒火內熾。擾亂血海。逼血妄行。其血色必紅紫。人必煩躁。宜涼血解毒湯。倍加連翹。大力子。使熱清毒解。回宜元參地

黃湯。合黃連解毒湯。治之。又有向來經閉不通。血海乾涸。適逢出瘡。經卽妄行。此毒氣拂鬱於衝任之際。三陽之症併發。其毒必重。若攻擊之。則血恐妄行不止。毒亦不透。而喘急腹脹等症至矣。且緩服藥。或當歸養心湯主之。其或發熱之初。經水適斷。宜柴胡四物湯。以防毒邪乘虛而入。致生他症。若已憎寒壯熱。神識不清。言語錯亂。此爲熱入血室。宜四物導赤散。加丹參。凌霄花。麥冬。與安神丸。兼而服之。或婦女正值見瘡之時。經水適行。暴啞不能言語。此因去血過多。心虛血耗。不能上榮於舌。故粹失音不語。治宜當歸養心湯。養心血。利心竅。自然能言矣。妊婦胎前。最忌出瘡。蓋瘡爲熱毒。熱能動胎。胎落則氣血虛耗。熱隨虛入。諸症悉起。而命危矣。故凡妊婦出瘡。當須清熱安胎。而不可少動其血。未出正出之時。治宜升麻。葛根。紅花。川芎。蘇葉。陳皮。前胡。桔梗。大力子。重用升麻二錢。以升提之。恐其墮胎也。至回後宜用生地。元參。紫草。石膏。川芎。連翹。知母。甘草。重用條芩一兩。旣以定胎。又能解毒。若其血已動。速用四物湯加條芩二三兩。焦朮二三錢。加川連苦

參之類。至產後雖當大補氣血之時。然發熱如過太甚。卽不嫌涼血疏托。斷不可驟用補藥。宜葱蘇飲以發其汗。經云。產婦不怕汗。汗出瘡自出。卽回後亦宜四物湯加石膏黃芩蘇葉陳皮凌霄花之類。而人參斷不可用。用則殺人。補藥亦然。切宜慎之。又按如瘡後日久。虛喘坐立不安。可用生甘草一錢。大熟地五六錢。三十日外。可用至二兩。

瘡後餘毒辨

氣高喘息。咳嗽痰壅。扶肚掀胸。音啞發噎。瘡瘍衄血。肩臂疼痛。餘毒之在肺也。痰涎稠粘。吐瀉不止。腹痛腹脹。唇瘡破裂。四肢痿軟。飢不能食。餘毒之在脾也。驚悸不眠。壯熱不重。咽喉乾渴。身體痒痛。睡中譫語。盜汗斑疹丹瘤。餘毒之在心也。夢中多驚。撮手振動。目赤星翳。悶亂不食。腫痛卵腫。乾嘔吐虻。寒戰咬牙。身發水泡。餘毒之在肝也。嘔吐不食。咬牙戛齒。口内生疳。臭氣冲人。瀉痢膿血。腸鳴失氣。大便不通。餘毒之在腸胃也。舌刺咽乾。不食多睡。耳聾手尖尙熱。猝然失音。手足逆

丹
何
辨
遠

冷。餘毒之在腎也。小腹滿痛。溺血遺水。小水不利。腰痛齒痛。頭腫痛。及脹。眼目上視。餘毒之在膀胱也。合眼不開。身腫不消。大熱引飲。鬱悶煩躁。餘毒之流入諸經也。以上不過舉其大概。各條雜症。尤宜詳辨。

瘡症各方

按上卷先後為次以便檢閱

瀉白散 治肺熱咳嗽手足心熱目黃口不吮乳

桑白皮

姜汁和蜜炙

地骨皮各一兩炙甘草五錢

為散每服四五錢引用糯米百粒竹葉一

把加橘紅桔梗名加味瀉白散有熱更加知母黃芩如有客邪禁用加人參茯苓

知母黃芩名加減瀉白散治肺炎喘嗽 (按人參忌用宜易西洋參為妥)

三豆湯

生萊豆 生黑豆 生黃豆 加生甘草 金銀花各一撮急火煎清湯為痘瘡

始終可服之妙藥未出時常服出可稀少將出時急服重可冀輕已出時恣服逆

可轉順盡出時頻服毒可易清尤能明目消疳真良方也

代天宣化丸 即五瘟丹預解時行疫癘傳染相似併治痘毒

人中黃

屬土甲己之年為君

黃芩

屬金乙庚之年為君

川黃柏

屬水丙辛之年為君

黑梔仁

屬木丁壬之年為君

川連

屬火戊癸之年為君

苦參 荊芥穗 防風 連翹 大力子 山荳肉 蘇葉上皆為佐 右前五味視

年之所屬者爲君其餘四味俱以爲臣爲君之分兩倍之爲臣者半之爲佐者如臣四分之三冬至日修合爲末取雪水煎升麻湯加竹瀝在內煮神麴糊爲丸龍眼核大用飛辰砂明雄黃爲衣每服一丸竹葉湯下

大清湯 治瘡子熱毒

大青 元參 生石膏 知母 生地 木通 荊芥 炙甘草 竹葉 各等分 古方加地骨皮

秘本大青湯 治瘡色紅豔

大青 元參 生石膏 知母 木通 黑梔仁 人中黃 升麻 桔梗 按瘡科金丹去升麻桔梗加大力子連翹黃連黃芩生地

消毒飲 治瘡症咽痛而發起遲

大力子 錢半 荊芥 一錢 炙草 五分 水煎日二服合瀉白散名瀉白消毒飲

清肺湯 治痘瘡肺熱喘嗽吐痰

桔梗 炙甘草 麥冬 款冬花 杏仁 川貝母 大力子 等分

犀角地黄湯 治傷寒溫病本應發汗而不得汗內蓄血及鼻衄吐血不盡內餘瘀

血大便出血面黃或中脘作痛

犀角 生地 牡丹皮 白芍 各等分水煎服喜妄如狂加大黃黃芩吐血衄

血者加扁柏藕汁童便脈大來遲腹不滿而自言滿者加當歸肉桂

菴荳燈芯湯 治瘡症發渴

菴荳一撮 燈芯一束 煎清湯代茶

清咽滋肺湯 治瘡後餘熱咳嗽聲瘖

元參 大力子 荊芥 川貝母 玉竹 天花粉 麥冬 桔梗 馬斗令

甘草 水煎服繆仲醅有薄荷無斗令

竹葉石膏湯 治大病後煩熱作渴傷寒解後嘔渴少氣

生石膏八錢 知母三錢 炙甘草一錢 粳米半合 竹葉一把 水煎分三服

白虎湯 治熱病壯熱煩渴

生石膏八錢

知母三錢

炙甘草一錢

粳米半合

加味人參白虎湯

白虎湯原方加人參

葛根

天花粉

麥冬

淡竹葉

白虎解毒湯

石膏

知母

天花粉

黃連

黃芩

山巵仁

麥冬

生地

淡竹葉

水二鍾煎減半去滓入犀角汁於藥內俟病人渴時以此藥與之代茶

無比散 治瘡後牙疳腐爛

取黃牛糞煨存性入龍腦少許研細吹之

加味清胃散 治瘡疹口舌生瘡牙齦腐爛

生地四錢

升麻五分

牡丹皮二錢

當歸錢半

川連一錢

犀角八分

連翹一錢

生甘草五分

小兒減半

加減清胃湯 治瘡後口瘡

元參 連翹 生地 黃柏 麥冬 木通 白茯苓 天花粉 廣皮 桔梗

甘草 燈芯

化斑湯 治痘與斑夾出用此消斑起痘

元參二錢 大力子一錢 柴胡八分 荆芥 防風各六分 連翹七分 木通八分

枳壳七分 蟬蛻五分 生甘草四分 燈芯廿莖 竹葉十五片 水煎溫服

古方化斑湯

人參 石膏 知母 大力子 連翹 地骨皮 淡竹葉 升麻 甘草

早米一撮引

萬氏化斑湯

元參 知母 石膏 大力子 麥冬 淡竹葉 桔梗 甘草

涼膈散 治瘟疫時行表裏實熱及心火亢盛目赤便秘胃熱發斑

酒大黃

二兩

玄明粉

連翹

黃芩

各一兩

山梔

八錢

薄荷

七錢

炙甘草

六錢

爲散每服五錢加竹葉十五片水煎溫服日三夜一得下熱退爲度

加減涼膈散

炒槐花

黃芩

陳皮

連翹

炙甘草

丹皮

大黃

薄荷

竹葉

華蓋散

治肺受風寒咳嗽聲重煩滿昏眩

麻黃

杏仁

各一錢

炙甘草

五分

蘇子

赤苓

桑皮

各一錢

加生姜二片紅棗一

枚水煎溫服

三拗湯

治風寒傷肺而咳誤行斂肺而壅咳喘急

麻黃

不去節

生甘草

杏仁

連皮尖

各等分加桔梗荊芥名加味三拗湯

宣毒發表湯

治瘡發熱時欲出未出各症並宜 凡地方瘡疹發作之時初潮之

際未明是否瘡症當以此方主之縱非瘡候卽是感冒風寒用之無礙 并附加

減法於後

薄荷葉八分 葛根 防風 荊芥穗 連翹 大力子 木通 只壳 淡竹葉

各一錢引加燈芯一束 天寒加蘇葉八分 葱白六支 暑月加生黃芩一錢

初潮無嗽宜加留白陳皮以甚其咳有咳切不可用

初潮往來潮熱者除淡竹葉免解膚熱致瘡難透表

初潮潮熱太甚者加赤苓生地生黃芩以保肺受火尅寒月宜減用

初潮無汗加葱白以發之更略加衣被不可遽用胡荽酒齏之法

初潮即見喘促加黃芩葶藶子瓜蒌仁以清肺開胸

初潮嘔吐加竹茹枇杷葉柿蒂

初潮鼻衄加鮮白茅根

初潮即現咽喉痛者加射干倍用大力子

初潮即現唇乾齒燥舌胎枯黃口渴等候加麥冬花粉黃芩甚則加川連黃柏梔

仁等味以預解之

初潮熱甚大便堅實加火麻仁二三錢以潤之用只實以導之免致閉塞熱毒不
得發越致變紫黑如便不通加大黃只壳以利之利之仍不通者必生氣喘鼻
扇等逆症卽用黃連解毒湯加大黃大力子連翹地骨皮桑白皮以通之如兼
口渴加麥冬天花粉

初潮便溏者減只壳溏而微汗者除薄荷竹葉泄瀉者除只壳加豬苓澤瀉以分
利之

初潮小便赤者除薄荷加赤苓或車前子小便不通者合導赤散除甘草加車前
子以通之溺血加牡丹皮生地川連黃芩黃柏卮仁等冬月寒天無汗不咳者
加麻黃二三分出不爽快有汗麻黃亦可加入或加生石膏六錢名曰雙解湯
導赤散 治心熱發搐及小腸實熱小便赤澀

生地

五錢

木通

生甘草

梢各一錢

竹葉

燈芯

溺血加辰砂

五分

洗心散

連翹 大力子 川連 生地 丹皮 木通 薄荷 生甘草 只壳 大黃

燈芯

敗毒散

羌活 獨活 柴胡 川芎 只壳 桔梗 茯苓 甘草 薄荷 爲細末每

服二錢水一盞煎七分温服

八珍湯 四君子湯合四物湯方見後

石斛清胃散 治瘡後嘔吐腎虛不食熱滯

石斛 茯苓 廣皮 只壳 扁荳 藿香 丹皮 赤芍等分 甘草減半 爲散

每服三四錢加生薑一片水煎温服

荆防敗毒散 此爲發散主方

荆 芥 防風 生地 酒黃芩 酒黃連 赤苓 乾葛 連翹 只壳

大力子 元參 杏仁 加竹葉 燈芯

芩連消毒飲 此方清金散火

黃芩 黃連 防風 卮仁 黃柏 只壳 地骨皮 石膏 乾葛 知母

連翹 大力子 花粉 淡竹葉

十宣散

黃連 黃芩 黃柏各一錢 兒茶 雄黃 苦參各五分 硼砂五分 乳香一分

元明粉三分 冰片少許 爲末每用五釐以竹管吹入喉中

金華丸

卮仁 黃芩 黃連 龍胆草 鬱金 雄黃 法丸燈芯地骨皮湯吞下

集聖丸

當歸 川芎 蘆薈 五靈脂 夜明砂 砂仁 青皮 莪朮 川連

酒炙蝦蟆 豬胆汁 米粉糊丸 清晨米飲吞下

胃苓湯

蒼朮 茯苓 豬苓 白朮 肉桂 陳皮 厚朴 澤瀉 甘草 本方宜除

去肉佳甘草二味方與瘡症相宜

葶藶丸 治瘡出氣喘將成龜胸

葶藶子炒研 漢防己 牽牛子炒 杏仁去油 萊菔子 煎服或用紅棗肉搗丸 大便溏

滑者除牽牛

清肺丹

鹽水炒陳皮 黃芩 黃連 黃柏 卮仁 杏仁 蘇子 稀糊丸

除疳散

煨秋石 五倍子 銅象 蠶退紙 硼砂 冰片 等分爲散

香連丸 治赤白痢疾 又香橘丸

木香五錢 陳皮 蓮肉減半 黃連一兩 用茱萸五錢 同黃連炒去茱萸不用神麩糊丸

養陰湯

熟地 大力子 當歸 白芍 麥冬 荊芥 川芎 薄荷 元參 連翹
水煎服或加黃連

元參地黃湯

生地 丹皮 元參 炒黑蒲黃 黑卮仁 水煎服

參蘇飲

前胡 蘇葉 人參 枳壳 陳皮 桔更 甘草 葛根 木香 茯苓

按本方宜除參桔甘草木香加連翹大力子川貝母

安胎飲

生地 川芎 當歸 黃芩 白朮 蘇葉 廣皮 甘草 或加川連 麥冬

四君子湯

人參 白朮 茯苓 甘草 紅棗 生姜

四物湯

生地 當歸 白芍 川芎

十全大補湯 四君子合四物再加黃芪肉桂

加減參蘇飲

蘇葉 前胡 粉乾葛 茯苓 枳壳 桔更 甘草 生姜 葱白

麻黃散

麻黃蜜酒同炒 枳壳 赤苓 木通 蘇葉 前胡 葛根 連翹 大力子 蟬蛻

紅花 葱白 水煎熱服

三仙散

紅花 大力子炒 川山甲炒成珠 水煎熱服

加味五仙散 治咳嗽不止

知母 貝母各二錢 款冬花四錢 桑皮七錢 桔更七錢 芽茶五錢 爲末每用三錢

杏仁煎湯下

加味導赤散 清胃瀉心火利小便止驚泄

薄荷 生地 木通 元參 車前子 連翹 川連 淡竹葉 引加燈芯

石膏 兼驚者調入辰砂滑石末

濟生散 治瘡欲出不出而生雜症入口即效

紫草茸 梅蕊 鳳尾草 鬱金各一錢 牛黃一分 川山甲五分 蟬退去頭尾一錢

每服一錢麥冬煎湯下 按此方不妥不如用麻黃散

葛根疏邪湯

葛根 防風 荆芥 蘇葉 大力子 連翹 地骨皮 前胡 赤苓 枳壳

木通 水煎服

回生消毒散 治瘡出而又收腹脹喘急

大力子 荆芥 防風 川貝 殭蠶各一錢 蟾酥 地龍各二錢 爲末 淡竹葉

煎湯下一錢

化斑解毒湯

元參 知母 石膏 大力子 連翹 人中黃另研 生大黃 淡竹葉 水煎
調入人中黃服

清寧散即瀉青丸 主瀉心肝

酒大黃 羌活 黑卮仁 川芎 當歸 防風 龍胆草 爲末蜜水調下

六仙散 法瘡後吐瀉不食發熱

馬蟻花 苡仁 蓮肉各二錢 藕節一兩 石斛 陳早米炒各五錢 爲末米飲下三錢

消毒清肺飲 治瘡後喘嗽鼻如烟煤

防風 荊芥 大力子 連翹 桑白皮 知母 貝母 廣皮 赤苓 百合

桔更 甘草 水煎服

復元散 治瘡後喘急鼻孔乾黑如煤

貝母 百合 阿膠珠 枇杷葉 桔更 鷲粟壳各一錢 桑皮湯下一錢

補肺阿膠散 治肺虛有火嗽無精液而氣梗鼻扇者

阿膠珠 兩半

馬兜鈴 一兩

大力子 一兩

杏仁 七錢

糯米 一兩

炙甘草 一兩

水煎服

犀角消毒飲

大力子 錢半

荊芥

黃芩

防風

犀角

甘草 各一錢

水煎日二服

五皮飲

大復皮

茯苓皮

五加皮

陳皮

鮮姜皮

水煎服

木通散

地龍 晒乾燒灰一錢

通草

木通 各五錢

爲末米飲下一錢

養血化斑湯

治白疹

人參

歸身

生地

紅花

蟬退

生姜

雙解湯

按此是古法鄭氏瘡科金丹改用宣毒發表湯

麻黃

石膏

蟬退

大力子

勾藤

乾葛

桂枝

卮子

只壳

蒼耳子

黃連解毒湯 治瘡熱甚火毒不退初出亦宜

黃連 黃芩 黑卮仁 木通 貝母 水煎服

加味黃連解毒湯

黃連 黃芩 黑卮仁 黃柏 連翹 荊芥 薄荷 石膏 元參 生地

土貝母 甘草 桔梗 竹瀝

知母石膏湯 方未見待查

溯源解毒湯 解胎毒良方

當歸身 川芎 生地 白芍 人參 連翹 川連 廣皮 木通 生草

竹葉

桂枝葛根湯 按升麻桂枝宜慎用

桂枝 葛根 防風 甘草 赤芍 升麻 生姜 豆豉

清熱除疳丸

川連 當歸各二錢 龍胆草 川芎各一錢 青皮 陳皮 蘆薈 乾蝦蟆火炙酒滲各一錢半

史君子肉錢半煨 爲末神麴糊丸米飲下

養血湯 治瘡出白色

生地 歸身 紅花 陳皮 甘草 生姜

黃連安神丸

川連 當歸 龍胆草 硃砂各二錢 全蝎水洗糯米拌炒乾七只 石菖蒲姜汁泡 茯神各錢半 爲末

滾水和作餅蒸熟以猪心血搗爲丸硃砂爲衣黍米大燈芯湯下十丸

清熱透肌湯 治瘡未透熱甚而咳

元參 石膏 大力子 荊芥 防風 前胡 葛根 杏仁 生甘草 水煎

葛根解肌湯 治瘡初起發熱咳嗽或乍涼乍熱已現瘡症並宜

初潮未明是否瘡症加減同宣毒發表湯并附已現瘡症加減於後

總除赤芍甘草不用

葛根 前胡 荆芥穗 羌活 大力子 勾藤 連翹 蟬退 木通 貝母
燈芯 赤芍 甘草 兩額不明加荷鼻五個

加減法見上宣表發湯

大連翹飲 解裏熱良方

連翹 防風 嬰麥 荆芥穗 木通 車前子 當歸 蟬退 黃芩 滑石
梔仁 柴胡 赤芍 加紫草茸 水煎溫服

益元散

一名天水散
一名六一散

治暑月小便不利

飛滑石 六兩

炙甘草 一兩

爲散清水調服加辰砂名辰砂益元散

祕本蘇解散

荆芥 防風 前胡 桔梗 蟬退 大力子 川芎 連翹 木通 羌活
蘇葉 升麻 按此方金丹已刪去不用

祕本羌活散鬱湯

荆芥 防風 羌活 連翹 桔更 川芎 大力子 白芷 甘草 大腹皮
紫草

四順清涼飲 治血熱便秘脈實者

當歸 赤芍 甘草 大黃等分 水煎臨服冲入白蜜一小匙

射干鼠粘子湯 治咽痛

大力子 射干 升麻 甘草 水煎服

靜遠主人射干鼠黏子湯

射干 山豆根 大力子 紫草 紫苑茸 蟬退 升麻 甘草 木通

石膏 桔更 燈芯九根引

涼血飲子

生地錢半 川連五分 黃芩 荆芥 元參各一錢 紅花三分 丹皮 赤芍各八分

木通七分 水煎

甘桔湯 治瘡症咽痛口舌生瘡

甘草 桔梗 山豆根 元參 大力子 荊芥各等分 麥冬加倍

甘桔清金湯 瘡後肺熱聲音不清

大力子七分 連翹 甘草各五錢 桔梗一兩 訶子皮三錢 爲末薄荷少許煎湯

下一錢或加薄荷水煎亦可如非聲音不清則去訶子皮

知母石膏湯 卽白虎湯

清金降火湯 治瘡後肺熱聲啞咳嗽

生地 白芍 當歸 括蕒仁 茯苓 廣皮 貝母 桑皮 麥冬 黃芩

杏仁 黃連 梔仁 元參 石膏 蘇梗 天冬 甘草 生薑 水煎服

治瘡後咳嗽失音驗方

大力子 黃芩 天花粉 薄荷葉 桔梗 甘草 水煎服

麥冬清肺湯

麥冬 知母 貝母 黃芩 杏仁 花粉 只壳 廣皮 丹皮 查肉
桔梗 水煎服

除熱清肺湯 治瘡盡透壯熱咳嗽大便閉結

石膏 麥冬 元參 生地 貝母 花粉 赤芍 甘草

麻杏石甘湯 治發汗後汗出而喘無大熱者

麻黃去節 杏仁 石膏 炙甘草 水煎溫服此乃麻黃湯去桂枝而兼越脾湯
也專祛上焦溫濕痰氣

祕本清氣化痰湯

石膏 杏仁 梔子 花粉 黃芩 薄荷 天麻 大力子 只壳 大黃
生脈散

人參 麥冬 五味子

六味湯

大熟地 山茱萸 大山藥 白茯苓 丹皮 澤瀉

貞元飲

熟地 歸身 炙甘草

杏仁煎

杏仁 石膏 天冬 木通 桑皮 葶藶子 大黃

清燥救肺湯

石膏 杏仁 麥冬 阿膠 北沙參 瓜蒌仁 桑葉 麻仁 甘草

越脾湯 治風水惡寒一身悉腫脈浮不渴續自汗出無大熱者

麻黃 石膏 炙甘草 生姜

當歸六黃湯 治自汗盜汗

當歸 生地 熟地 黃芪 黃芩 黃連 黃柏

益黃散

廣皮 青皮 訶子肉 炙甘草 丁香

大黃湯

酒大黃 玄明粉 牡丹皮 瓜蒌仁 桃仁

茵陳蒿湯 治濕熱發黃便秘脈實

茵陳蒿 梔子 大黃

化毒湯

紫草茸 甘草 升麻 蟬退 地骨皮 黃芩 糯米

大補陰丸

鹽水炒黃柏 鹽水炒知母 酒生地 炙龜版 豬骨髓和蜜丸

甘草瀉心湯

半夏 乾薑 甘草 黃連 黃芩 大棗

小承氣湯

大黃 厚朴 枳實

四苓散 治小便赤澀脹痛及溫熱時行煩渴

生白朮 茯苓 豬苓 澤瀉

枳殼湯 治痘瘡誤服參芪腹脹喘急

枳殼 川朴 廣皮 甘草

黃芩湯 治伏氣發溫太陽少陽合病自利

黃芩 白芍 甘草 大棗

白頭翁湯 治熱痢下重

白頭翁 川連 黃柏 秦皮

消風散

生地 當歸 防風 蟬退 知母 苦參 荆芥 麻仁 大力子 石膏

大通 水煎食遠服 一方有蒼朮甘草

又消風散 治風熱咳嗽遍身疥癩小兒瘡疹餘熱

川芎 羌活 防風 荆芥穗 藿香 黨參 茯苓 殭蠶 蟬退等分

炙甘草 廣皮 川朴減半 每服五錢水煎

門冬甘露飲 治瘡子熱甚而渴

麥冬 元參 黃芩 天花粉 連翹 生甘草 燈芯 竹葉

七味白朮散 治胃虛津氣不行而渴

黨參 白朮 茯苓 甘草 藿香 木香 葛根等分

異功散 四君子湯加陳皮

葛根麥門冬湯 治熱毒斑頭疼壯熱心神煩悶

葛根 麥冬各一錢 石膏 赤芍 升麻 人參 甘草 茯苓 竹葉

解毒化斑湯 瘡疹現形二三日宜用

連翹 大力子 防風 荆芥穗 歸尾 桔梗 查肉 生地 黃芩 蟬退

紫草茸 西河柳 乾葛 川芎 生甘草 犀角汁

瀉肝湯 缺

龍胆瀉肝湯 治肝經濕熱腋脇滿痛小便赤澀

柴胡梢 澤瀉各錢半 車前 木通 當歸梢 龍胆草各八分 生地二錢 生薑三片

水煎食遠服以美饌壓之

祕本清解散

連翹 大力子 桔梗 木通 蟬退 升麻 防風 荆芥 前胡 黃芩

黃連 紫草 石膏 甘草 桂枝尖 凡用此方總宜除去升麻桂枝桔梗更三味

附清解湯 前方去桔梗更蟬退荆芥前胡紫草甘草桂枝加生地丹皮白芷

瀉青丸 治肝經實熱大便不通腸風便血陰汗臊臭

當歸 川芎 黑山梔 大黃 羌活 防風 龍胆草等分 滴水丸

祕本升解散 又名蘇解散

荆芥 防風 前胡 桔梗 蟬退 大力子 升麻 川芎 連翹 木通
羌活 蘇葉

小柴胡湯 治小陽受邪往來寒熱脈弦脇痛而嘔

柴胡 黃芩 人參 甘草 半夏 生薑 大棗

滋腎丸 治陰虛大渴小便濇痛熱起足心

厚黃柏 肉桂 知母 蜜丸

麥門冬湯 治痘瘡便實而渴

生地三錢 麥冬二錢 歸身一錢 白芍錢半 水煎溫服

清神化毒湯 治心肝火旺咬牙

升麻 生地 木通 甘草 防風 麥冬

三陰煎

五陰煎 二方皆缺

甘露飲 治心熱咽喉痛口舌生瘡并瘡疹已發未發并治熱上攻牙根腫痛動搖

生地 熟地 天冬 麥冬 石斛 黃芩 枳殼 茵陳 炙甘草 枇杷葉

等分 爲粗末每服二錢水煎食後服牙痛則含漱并服

升麻湯 一名升麻葛根湯 治陽明發熱及痘疹初起

升麻 一錢 葛根 白芍 各錢半 炙甘草 八分

升陽散鬱湯 方未見

升葛湯 方未見

四物導赤散 四物合導赤

滋肺飲

大淮山 苡仁 茯苓 蕭豈 桑皮 丹皮 歸尾 甘草梢 百合

北沙參

加味地黃湯

熟地 山藥 丹皮 澤瀉 茯苓 萸肉 麥冬 玉竹 黃柏

車前 苡仁

加味四苓散

豬苓 木通 車前 赤苓 澤瀉 黃芩 大力子 川連 燈芯

利金湯 治肺燥塞不利而咳

川貝 茯苓 陳皮 枳壳 桔更 甘草 生姜 白蜜

涼血地黃湯

生地 歸尾 川連 黑山卮 元參 甘草

射干消毒飲 治瘡後咳嗽聲啞咽喉腫痛

射干 元參 連翹 荊芥 大力子等分 甘草減半

加味鼠黏子湯

生甘草 桔梗 大力子 荊芥 橘紅 射干 連翹 山荳根

通音煎

川貝母 款冬花 胡桃肉 白蜜 飯鑊上蒸餅常煎湯飲

清胃散 治胃中蘊熱中脘作痛痛後火氣發泄必作寒熱乃止及齒齲腫痛出血

痛引頭腦

生地四錢 升麻錢半 牡丹皮五錢 當歸 川連各三錢 分三服

清金瀉火湯

天冬 麥冬 知母 黃芩 石膏 甘草 桔更 馬斗令 木通 梔子

花粉 紫苑

清上飲

川連 石膏 防風 薄荷 大力子 甘草 連翹 桔更 黃芩

花粉 元參

珠礬散

辰砂 枯礬

川連解毒桔更湯

酒川連 酒黃芩 黑山扈 石膏 桔更 生甘草 連翹 大力子

薄荷 荆芥

清金散

人中白 川連 自然銅 黃柏 冰片 月石 牙疳加川楝子

當歸散 治口舌生瘡牙根毒發大便秘結

當歸 赤芍各一錢 川芎五分 大黃三錢 生甘草五分 生姜一片

燒鹽散 治牙疳潰爛

取橡斗大者實鹽滿壳合起鐵絲紮定燒存性以碗覆地入麝少許研細敷之

綠袍散 治一切口瘡腐爛

荆芥穗 薄荷 青黛各二錢 玄明粉 硼砂各二錢 甘草錢半 百藥煎二錢半

爲散點舌上令其自化

馬鳴散 治走馬牙疳良方

人中白 煨白五錢

蠶退紙 燒灰二錢

生五楮子 一錢

又五楮子 一個

生明礬 一錢研細

將礬末裝入楮子內火煨以礬枯爲度同爲細末用米泔洗患處然後以藥搽之

又吹口藥方

黃柏 一錢

僵蠶 一錢

只壳 一錢

生甘草 五分

薄荷 五分

冰片 三釐

山荳根 一錢

爲極細末日三次

紋蛤散

蛤壳 二兩

雄黃 五錢

枯礬 五分

蠶退紙 一錢

青黛 一錢

冰片 二分

共爲末先

以米泔洗患處後搽藥以愈爲度

內金散

鷄內金

銅青

白芷

麝香

前三味焙再同麝同研勻
每用一匙搽患處

柴胡飲子 治風熱眼眶赤爛

柴胡 羌活 防風 赤芍 桔更 荆芥 生地各一錢 甘草五分 水煎

附蟬菊飲 治痘瘡入目或病後生翳障

蟬退 白菊花 各等分水煎將服再和入蜜汁煎沸食後溫服

羌菊散 治熱毒上攻眼目生翳并暴赤羞明

羌活 白菊花 蟬退 防風 木賊草 黑山扈 大黃 穀精草 白蒺藜

沙苑蒺藜 川連 甘草 爲末米飲下一錢大便滑者去大便秘加只壳微導之

羚羊角散 治瘡後餘毒上攻羞明怕日雲翳眵淚俱多紅赤腫閉

羚羊角_屑 黃芩 草決明 車前子 防風 大黃 玄明粉 大力子 連翹

川連 穀精草 蜜蒙花 眼紅加木賊草龍胆草

加減清毒撥翳湯 治瘡後眼目生翳目赤紅腫眼眶皮赤爛最驗

生地 白菊花 酒黃芩 大力子 連翹 當歸尾 柴胡 川芎 紅花

木賊 草決明 白蒺藜 甘草 水煎服

決明夜靈散 治雀目立效

石決明 夜明砂各二兩 用雄豬肝一兩羊肝更好 將肝切作兩片將藥末放在

肝上以一片蓋之用線紮緊勿令藥末漏出以米泔煎服

蟬花散 治奇經客邪目病

蟬退半兩 蛇退酥炙三錢 川芎 防風 羌活 炙甘草 當歸 茯苓各一兩

赤芍 石決明 蒼朮各半兩 為散每服二三錢茶清送下

真金散 治眼胞赤爛點眼藥

川連 黃柏 川芎 歸尾 杏仁 研末乳汁浸一夜飯上蒸透取濃汁點眼

瀉黃散

防風四錢 黑山扈一錢 藿香葉七分 石膏五錢 甘草二錢 為末白湯下

清陽散火湯

荊芥 防風 連翹 羌活 黃芩 甘草 川芎 黑山扈 歸尾
麥冬清肺飲

麥冬 知母 貝母 黃芩 杏仁 花粉 枳壳 陳皮 丹皮 查肉
桔梗 水煎

消積丸

丁香 九粒

砂仁 十二粒

烏梅肉 三個

巴豆 兩粒去皮
油心膜

爲末細麵糊丸

梔子飲

黑山扈 丹皮 柴胡 薄荷 廣皮 甘草 歸尾 山查 黃芩 神曲

敗毒散

羌活 獨活 柴胡 枳壳 桔梗 茯苓 甘草 薄荷 水煎

柴胡清肝散

柴胡 黃芩 黑山扈 川芎 連翹 桔梗 生甘草 丹參

導痰湯

半夏 茯苓 陳皮 甘草 只壳 胆星

麻黃湯

麻黃 桂枝 甘草 杏仁

蒼朮二陳湯

半夏 茯苓 陳皮 甘草 蒼朮

普濟消毒飲

黃芩 川連 桔梗 生甘草 廣皮 元參 連翹 板藍根 馬勃

大力子 僵蠶 升麻 柴胡

黑消散

大黃 黃連 黃芩 黃柏 猪胆汁同蜜調塗

柴苓湯

柴胡 半夏 人參 黃芩 甘草 豬苓 澤瀉 茯苓 白朮 肉桂
生姜 大棗

抱龍丸 治痘瘡驚

琥珀 天竺黃 白檀香 人參 茯苓各一兩五錢 只壳 只實各一兩 辰砂五錢

金箔一百張 砂山藥一兩 胆星一兩 爲末每藥二兩取新汲井水一兩同入乳鉢

內搗勻爲丸陰乾皂子大每用一丸薄荷湯下

加減守病丸

茅朮 胆星 白芷 查肉 川芎 橘核 神曲 半夏 吳萸酒煮麵糊丸

銀花解毒湯

金銀花 大力子 甘草 連翹 柴胡 黃芩 扁豆 車前子 陳皮

加減平胃散

陳皮 川朴 柴胡 桔梗 山查 只壳 神曲

升麻石膏湯

升麻 石膏 桔梗 花粉 黃芩 山梔 黃柏 只壳 紫草 甘草

天真膏 治瘡後咳嗽不止內熱不清心神不寧夜臥不安或生疥瘡

生地 麥冬 元參 沙參 黃芪 苡仁 焦白朮君 茯苓 茯神 棗仁

當歸 丹皮 陳皮 紫苑茸臣 炒知母 桑皮佐 右藥入沙鍋內文武火煮兩

時辰去滓將藥汁水澄清再熬加蜜成膏每用三匙開水沖服

香砂六君湯 治氣虛痰滯食滯等症

人參 白朮 茯苓 甘草 陳皮 半夏 木香 砂仁 姜 棗

褐子丸

萊菔子 青皮 陳皮 檳榔 赤苓 牽牛 木香 五靈脂

消癖丸

大黃一兩 泡姜五錢 熟附子三錢 炙鼈甲八錢 姜製川連一錢

白玉餅

滑石 胆星 半夏 輕粉 巴豆 糯米粥丸 菘荳燈芯湯下

加減胃苓散

蒼朮 防風 陳皮 川朴 猪苓 黑山扈 木通 澤瀉 甘草

三稜散

三稜 莪朮 神曲 麥冬 陳皮 甘草 茯苓 青皮 滑石 澤瀉

加減蓮子清心飲

沙參 麥冬 茯苓 甘草 石蓮肉 車前子 地骨皮 澤瀉 黃芩

石菖蒲 生地 遠志

厚朴湯 治脾胃虛寒作脹腹中時痛時止

厚朴 廣皮 甘草 茯苓 乾薑 半夏 枳實 生姜 大棗

乾姜黃連黃芩人參湯 治胃虛客熱痞滿

乾薑 黃芩 黃連 黨參等分

地榆湯

地榆 只壳 葛根 黃芩 黃連 黑卮仁 犀角

滋陰潤燥湯

生地 丹皮 荆芥 薄荷 黑山卮 黃芩 柴胡 紅花 花粉 柴草

猪苓湯

猪苓 茯苓 澤瀉 滑石 阿膠

黃連阿膠湯

黃連二錢 黃芩一錢 芍藥二錢 阿膠珠三兩 鷄子黃一枚 先煎前三味去滓入

阿膠烱盡冲入鷄子黃攪勻服

槐花散

槐花 側柏 荆芥 只壳 防風 黃芩 地榆 生地

柴葛桂枝湯

柴胡 乾葛 甘草 羌活 防風 大力子 黑山扈 丹皮 桂枝

柴葛湯 前方去桂枝

導赤解毒湯 導赤散加大力子連翹川連黃芩山扈等

清瘡飲

石膏 知母 川朴 川貝 茯苓 陳皮 青皮 甘草 柴胡 當歸

加味石膏湯

煨石膏 柴胡 陳皮 甘草

清脾飲

白朮 川朴 青皮 半夏 茯苓 黃芩 柴胡 陳皮 甘草 草薢仁

元參升麻湯

元參 升麻 大力子 荆芥 防風 甘草 黃芩 地骨皮

解毒化斑湯 瘡現形一二日宜用 方見前

破逆化斑湯

元參 川連 黃芩 知母 山巵 柴胡 丹參 桃仁 丹皮 石膏

茜根 荷鼻 蘆根

消斑解毒湯

荊芥 防風 連翹 金銀花 大力子 甘草 木通 黃芩 知母

紫草 山巵

六味化丹散

生地 丹皮 紅花 石膏 荊芥 大力子

生地防風湯

生地 防風 薄荷 荊芥 大力子 連翹 桔梗 竹葉 石膏

元參解毒湯

元參 生地 紅花 連翹 地骨皮 石膏 防風 木通 荆芥
歸尾 竹葉

消風化毒湯

麻黃 桂枝 升麻 乾葛 大力子 羌活 防風 荆芥

消毒散 又名和解散

升麻 葛根 薄荷 蟬退 大力子 只壳 木通 防風 桔梗 荆芥

生萊菔子

消風散

川芎 廣皮 蟬退 丹參 羌活 薑蠶 荆芥 防風

又消風散 治風熱咳嗽遍身疥癩小兒瘡疹餘熱

川芎 羌活 防風 荆芥穗 藿香 黨參 茯苓 薑蠶 蟬退 等分

炙甘草 廣皮 川朴 減半 每服五錢

雙和湯 治瘡後虛羸

熟地一錢 白芍一錢 黃芪七分 當歸七分 川芎四分 甘草四分 肉桂三分

生薑一片 大棗二粒

涼血地黃湯

生地 歸尾 川連 梔仁 元參 甘草

元參地黃湯

元參 生地 丹皮 梔仁 升麻 白芍 甘草

涼血解毒湯 涼血地黃湯去甘草加荆芥連翹大力子

葱蘇飲

蘇葉 前胡 廣皮 桔梗 紅花 川芎 乾葛 葱白

柴胡四物湯

柴胡 黃芩 黨參 生地 歸身 川芎 白芍 知母 麥冬 痰竹葉

地骨皮 按此方宜去黨參

清瘟敗毒散 此治疫疹十二經泄火之藥也

生石膏 小生地 犀角 黑山梔 桔梗 黃芩 知母 赤芍 元參

連翹 丹皮 甘草 竹葉

桔梗湯 治冬時伏邪發於少陰咽痛不差及風熱肺氣不清

桔梗 甘草各三錢 水煎緩緩服之

紫雪丹 治內外熱熾狂越躁亂心腹疔痛口舌生瘡一切實火閉結諸藥不效者

黃金^{十兩} 用水三斗先煮一斗旋添旋煮至一斗為度去金取汁煮下藥 石膏

寒水石^{如無真者元精石代} 磁石^{醋煨} 白滑石^{各五兩} 上四味搗入前汁中煮至五升入下藥

犀角^{五錢} 羚羊角^{五錢} 青木香 沉香^{各五錢} 元參 升麻^{各兩半} 生甘草^{八錢}

丁香^{一錢} 上八味入前汁中煮取一升五合去滓入下藥 芒硝^{一兩} 燄硝^{三兩}

上二味入前汁中微火上煎柳木槌攪不住手候有七合半投在水盆中半日欲

凝入下藥 飛硃砂^{五錢} 麝香^{一錢二分} 上二味入前藥中攪勻勿見火寒之三日

候凝結成霜紫色鉛罐收貯每服一分至二分杵細冷水調下